

lo nu binxo

fi'e la .franz.kafkas.

sei la [.xorxes](#). cu fanva

ni'o pa mo'o

ni'o la .gregor.samsas. ca lo cerni ba lo nu raktu senva cu co'a cikna gi'e facki lo du'u gy bu'u lo ckana cu ba'o binxo lo rigni cinki •i gy vreta lo jdari trixe noi calku tarmi •i gy ca lo nu milxe lafti lo stedu cu viska lo punli je bunre betfu noi te senta fi lo tinsa bargu pagbu •i lo gacri boxfo cu ja'a ru'e cpana renvi gi'e pu'o sakli farlu lo loldi •i lo so'i tuple noi pindi cinla fi'o se karbi lo xadni cu za'a marbi claxu desku

ni'o lu ma fasnu ri'i mi sei gy pensi li'u •i na se senva •i lo gy kumfa noi milxe cmalu gi'e ku'i ja'a remna kumfa cu za'o smaji se sruri lo vo slabu bitmu •i lo vrici bukpu mupli to lo nu litru vecnu cu jibri la .samsas. toi cu kuspe cpana lo jubme noi ga'u ke'a dandu fa lo pixra poi gy ke'a pu za katna vimcu lo karni gi'e punji lo melbi ke solji skari greku •i ra jarco lo ninmu poi dasni lo skapi mapku jo'u lo skapi karli gi'e sraji zutse gi'e jgari lo tilju skapi ke birka gacri noi mipri pi ro lo dizlo birka lo zgana

ni'o la .gregor. cu catlu fa'a lo canko •i lo carvi tcima to lo carvi dargu cu se tirna farlu lo jinme kajna be lo canko toi cu rinka lo nu gy mutce badri •i lu .e'e mi ze'a ba sipna sei gy pensi se'u gi'e to'e morji ro lo vi cizra li'u •i ku'i la'e di'u na sai cumki •i gy se tcaci lo nu sipna fau lo nu vreta lo pritu mlana •i ku'i gy va'o lo ca tcini na kakne lo nu gunro ja'e lo nu tai vreta •i gy tsali renro gy lo pritu mlana •i ku'i ro

roi xruti lo ka lanxe cpana lo trixe •i ju'o gy cu pa no no roi troci fau lo nu gasnu lo nu ganlo fa lo kanla te zu'e lo nu na viska lo desku tuple •i gy co'u troci ca lo po'o nu co'a milxe je kandi cortu lo mlana noi gy pu no roi cortu ke'a •i lu doi cevni sei gy pensi mi pu cuxna lo mutce nandu jibri •i litru ca'o lo djedi jo'u lo drata djedi •i lo nu litru vecnu cu mutce zmadu lo nu stali lo ralju briju kei lo ka tatpi rinka •i ji'a sarcu fa lo nu se raktu tu'a lo trene tcika •i lo sanmi cu mabla gi'e nai dikni •i lo nu remna jikca cu ranji cenba gi'e no roi stodi gi'e no roi te stace •i .e'i dapma ro da li'u •i gy ganse lo milxe cpina be lo betfu •i gy masno cpare lo trixe lo stedu fanmo be lo ckana te zu'e lo nu kakne lo nu lafti lo stedu •i gy facti lo du'u lo cpina pagbu cu se gacri lo cmalu je blabi mokca noi gy na djuno lo du'u ma kau krasi ke'a •i gy troci lo nu pencu lo pagbu lo tuple •i ku'i ba zi vimcu lo tuple ki'u lo nu lo nu satre cu rinka lo nu lenku desku

ni'o gy cpare xruti lo cfari se zvati •i lu lo nu da clira ke ckana cliva sei gy pensi cu rinka lo nu da binxo lo fenki •i lo remna cu nitcu lo nu sipna •i lo drata ke litru vecnu cu jmive tai tu'a lo nobli turni •i mu'a mi ca lo cerni cu xruti lo zdani te zu'e lo nu ganzu lo se cpedu poi mi pu cpacu •i je lo drata vecnu cu za'o zutse gi'e citka lo cerni sanmi •i ga nai da'i mi troci la'e di'u gi ja'e bo mi se renro fi lo klaji •i ku'i ju'o cu'i la'e di'u traji lo ka xamgu mi •i mi va'o lo nu da'i mi na bilga lo nu sevzi rinju se va'u lo rimi cu da'i pu zu cliva •i da'i mi klama lo ralju gi'e mulno cusku lo mi se jinvi •i da'i ia ra farlu fi lo jubme •i ie cizra

tcaci fa lo nu zutse lo jubme gi'e tavla to'o lo galto lo se jibri noi cnita
zi'e noi ji'a bilga mu'i lo nu lo ralju cu juxre tirna kei lo nu binxo lo
mutce jibni .i .o'o lo se pacna cu za'o na mo'u se xaksu .i mi va'o lo nu
ca da ponse lo jdini poi banzu lo nu pleji lo se dejni be lo rirni bei lo
ralju to za'o renvi fi lo nanca be li mu ji'i xa toi cu ju'o sai pleji .i ca la'e
di'u lo banli mokca cu to'e cliva .i .ei mi nau binxo lo sanli ki'u lo nu
lo trene cu cliva ti'u li mu li'u

ni'o gy catlu lo junla noi rilti se sance gi'e cpana lo se dacru .i lu ue
doi cevni sei gy pensi li'u .i tcika fa li xa pi'e ci no .i lo junla xance
ca'o surla movdu lo crane .i tcika fa li pi'e za'u ji'a sai ci no .i tcika fa
li pi'e me'i ru'e vo mu .i lu xu lo junla na pu janbe li'u .i to'o lo ckana
cu kakne lo nu viska lo nu ba'o drani se punji fi li vo .i la'a ja'a pu
janbe .i ku'i xu cumki fa lo nu za'o surla sipna va'o lo savru poi se
desku lo nilce .i je'u gy pu na mutce surla sipna .i ku'i ju'o cu'i ja'a
mutce condi .i nau zunkte ma .i lo balvi lamji trene cu cliva ti'u li ze .i
lo nu cpacu ra cu se sarcu lo nu fenki sutra .i lo bukpu mupli cu za'o
na se bakfu .i gy mi'u na banzu cikna je bredi .i gy va'o lo ji'a sai nu
snada lo nu cpacu lo trene cu na ba rivbi lo nu lo ralju cu sfaa cusku
.i ki'u bo ru'a lo se minde nanla pu denpa tu'a lo trene pe ti'u li mu
gi'e xa'o gasnu lo nu djuno lo du'u gy na zvati .i lo nanla cu selfu se
ponse lo ralju gi'e na virnu gi'e na menli certu .i ma fasnu va'o lo nu
gy cusku lo se du'u gy bilma .i ku'i la'e di'u mutce se burna gi'e senpi
rinka ki'u lo nu la .gregor. cu bilma no roi lo nanca be li mu be'o poi

ze'a ke'a gy se jibri •i la'a lo ralju cu ba klama lo zdani be gy fi'o kansa lo binra mikce gi'e pante fi lo rimi be gy fe lo nu lo bersa cu tai lazni •i da'i lo ralju cu rivbi ro fapro se cusku lo nu benji lo mikce noi jinvi lo du'u zasti fa lo po'o prane kanro remna noi ku'i se rigni lo nu gunka •i xu ju'o cu'i ra drani tu'a gy •i la .gregor. cu dukse lo ka sipna djica kei lo nu pu ze'u sipna gi'e ku'i se tcini lo banzu zabna gi'e ji'a sai mutce xagji

ni'o da ca lo nu gy sutra pensi la'e di'u gi'e na kakne lo nu jdice lo nu cliva lo ckana to ca mi'u jarco fa lo junla li xa pi'e vo mu toi cu na'e darsi darxi lo vorme poi lamji lo stedu pagbu be lo ckana

ni'o lu doi .gregor. sei da cusku to da mamta toi •i tcika fa li xa pi'e vo mu •i .ai dai do co'a litru li'u •i iu titla voksa •i ku'i la .gregor. cu se jenca ca lo nu spuda •i gy tirna da poi li'a voksa gy zi'e noi ku'i mixre vasru to'o lo mutce condi lo se cmoni noi na'e se renvi cortu rinka zi'e noi curmi ca lo cfari lo nu lo valsi cu klina se dirce kei gi'e ku'i daspo vy ca lo nu lo sance cu ranji kei ja'e lo nu na djuno lo du'u xu kau drani tirna •i la .gregor. cu djica lo nu tcila spuda gi'e ciksi ro da •i ku'i va'o lo ca tcini cu cusku di'e po'o •i lu .ai .ai ki'e doi mamta •i mi zi ckana cliva li'u •i la'a ri'a tu'a lo mudri vorme bu'u lo bartu lo nu lo voksa be la .gregor. ba'o cenba cu na se ganse •i lo mamta cu binxo lo surla mu'i lo te spuda gi'e cliva •i ku'i lo drata se lanzu ri'a lo tordu nu casnu cu binxo lo sanji be lo nu ua la .gregor. cu za'o zvati lo zdani •i lo patfu cu ralci je ku'i jdari darxi pa lo mlana vorme •i lu doi

.gregor. doi .gregor. sei py krixa •i ma fasnu li'u •i ba zi bo py za'u
re'u troci se pi'o lo zmadu dizlo voksa •i lu doi .gregor. doi .gregor.
li'u •i to'o lo drata mlana vorme lo mensi cu to'e cladu pante •i lu
doi .gregor. •i xu do bilma •i xu do da nitcu li'u •i la .gregor. cu spuda
fa'a lo re mlana fi lu mi bredi li'u •i gy bacru se rai lo ka kurji •i gy
denpa ze'u lo clani lo valsi bi'i lo valsi •i gy troci lo nu vimcu ro cizra
lo voksa •i lo patfu cu xruti lo cerni sanmi •i ku'i lo mensi cu to'e
cladu cusku lu doi .gregor. .e'o sai ko gasnu lo nu kalri li'u •i ku'i la
.gregor. cu na sai platu lo nu gasnu lo nu kalri •i je'u gy zanru pensi lo
se tcaci poi nu gy gasnu lo nu stela ganlo fa lo vorme zi'e noi gy zunkte
ke'a ca ge lo nu litru gi ji'a sai lo nu zvati lo zdani

ni'o pa mai gy platu lo nu surla cliva lo ckana gi'e binxo lo dasni se
cau lo nu da fanza kei gi'e ra'u citka lo cerni sanmi gi'e ba bo pensi lo
ro drata ki'u lo nu li'a gy bu'u lo ckana na ba snada lo nu racli jdice da
•i gy morji lo du'u pu so'o roi ge milxe cortu ri'a ju'o cu'i lo nu na'e
mapti vreta gi facki ca lo nu cliva lo ckana kei lo du'u lo nu cortu cu
xanri po'o •i gy kucli lo du'u zgana lo nu lo cabna xanri cu canci •i gy
na sai senpi lo du'u lo voksa nu cenba cu na drata lo se bilma be fi lo
lenku noi lo litru vecnu cu ta'e jibri bilma

ni'o lo nu renro lo gacri cu frili •i lo nu la .gregor. cu binxo lo milxe
punli cu banzu lo nu lo gacri cu farlu •i ku'i lo drata cu nandu ki'u lo
nu la .gregor. cu ganra mutce •i gy nitcu lo nu se birka gi'e se xance
kei lo nu binxo lo sanli •i ku'i gy ba'i se tuple so'i cmalu noi ru'i vrici

to'e cando zi'e noi gy na kakne lo nu jitro •i va'o lo nu gy djica lo nu polje pa lo tuple zo'u ri pa moi lo binxo be lo sirji •i va'o lo nu gy snada lo nu pilno pa lo tuple lo se djica zo'u ro lo drata cu to'e cando tai lo nu zifre kei fau lo nu desku poi carmi gi'e rinka lo nu cortu •i lu .ei mi na prali claxu stali lo ckana li'u se cusku la .gregor. gy

ni'o gy djica lo nu cliva lo ckana co'a tu'a lo dizlo pagbu be lo xadni •i ku'i lo dizlo pagbu noi gy za'o na viska gi'e na kakne lo nu satci se xanri zo'u za'a nandu fa lo nu gasnu lo nu ra muvdu •i lo nu muvdu cu mutce masno •i gy na'e ru'e fengu renro gy lo crane fau lo nu vlipa traji se cau lo nu pensi lo se rinka •i ku'i gy cu srera kanji lo farna gi'e carmi janli lo jamfu fanmo be lo ckana •i lo nu cpina cortu cu ctuca gy lo nu la'a lo sa'e dizlo pagbu be lo xadni be gy ca traji lo ka ganse

ni'o se ja'e la'e di'u gy troci lo nu lebna lo galtu pagbu be lo xadni lo ckana •i gy kurji gasnu lo nu farna lo stedu fa lo korbi be lo ckana •i frili snada •i lo xadni to'e ri'a nai lo nu ganra gi'e tilju cu masno jersi lo stedu fau lo nu carna •i ku'i ca lo nu lo stedu cu dandu bu'u lo vacri re'o nai lo ckana zo'u gy co'a terpa lo nu za'o tai muvdu •i va'o lo nu da'i gy curmi lo nu gy farlu zo'u ju'o sai lo stedu cu se xrani •i .ei li'a gy na ba'e nau binxo lo na'e sanji •i lo nu stali lo ckana cu zmadu fi lo ka se nelci gy

ni'o gy tatpi vasxu ba lo nu tai nandu troci •i gy za'o vreta tai lo purci gi'e viska lo cmalu tuple noi za'u re'u simxu lo ka damba se kai

lo ka ju'o cu'i ba'o zenba lo ka vlipa •i gy na troci lo nu gasnu lo nu ra surla kei gi'e ganzu lo kalsa •i gy za'u re'u sevzi cusku lo se du'u .ei gy na stali lo ckana gi'e racli zukte lo nu friti ro da kei lo nu cumki binxo lo to'e rinju be cy •i ku'i ji'a di'i morji lo du'u lo nu mutce to'e xanka pensi cu xamgu zmadu lo nu na'e pacna jdice •i gy gasnu lo nu farna lo kanla fa lo canko •i ku'i uu gy na se prali lo mutce mukti lo cerni brumu jvinu noi mipri lo ji'a sai ragve mlana be lo jarki klaji •i lu xa'o tcika fa li ze sei ca lo nu lo junla cu se sance cu sevzi cusku •i tcika fa li ze •i je za'o tai brumu li'u •i gy ze'i stali lo ka vreta gi'e surla gi'e ruble vasxu •i da'i gy kanpe lo nu lo fatci je tcaci tcini cu xruti to'e canci lo traji smaji

ni'o ku'i gy ba sevzi cusku lu .ei mi pu lo nu sance jarco li ze pi'e pa mu cu mo'u cliva lo ckana ta'i ma kau •i ju'o ca la'e di'u da pe lo kagni cu ba ba'o klama ti te zu'e lo nu da te preti mi •i ki'u bo lo kagni cu co'a kalri pu li ze li'u •i gy co'a di'i gasnu lo nu slilu fa lo mulno clani xadni fa'a lo bartu be lo ckana •i va'o lo nu gy curmi lo nu tai farlu zo'u lo stedu noi gy platu lo nu tsali lafti ke'a ca lo nu farlu cu la'a stali lo ka na'e se xrani •i lo xadni trixe cu simlu lo ka jdari •i ju'o ba lifri no xlali ca lo nu farlu lo loldi gacri •i traji nandu fa lo nu kurji lo savru poi ba se cupra zi'e noi la'a rinka lo nu da ze'o ro vorme cu terpa ja do'a nai se raktu •i ku'i .ei troci

ni'o la .gregor. ca lo nu gy xadba balni lo ckana to lo cnino tadji cu se kelci se mau lo nu nandu se troci •i banzu fa lo nu slilu catke toi cu

se sidbo lo du'u mutce frili va'o lo nu da sidju •i lo re vlipa prenu to gy pensi lo patfu jo'u lo selfu nixli toi cu mutce banzu •i po'o da'i da setca lo birka lo cnita be lo bargu trixe ja'e lo nu vimcu gy lo ckana kei gi'e binxo lo korcu ri'a lo junta gi'e sarji lo nu kurji sukxa carna bu'u lo loldi noi la'a lo tuple fau lo nu cpana ke'a cu cpacu lo krinu be lo nu zasti •i je'u lo vorme cu ganlo •i se ju ku'i xu .ei cpedu lo nu da sidju •i gy to'e ki'u nai lo nu nitcu cu na snada lo nu rivbi lo nu cisma ri'a lo nu tai te sidbo

ni'o gy ca lo nu slilu co zenba lo ka tsali cu ja'a ru'e snada lo nu stali lo lanxe •i gy ba zi bilga lo nu mo'u jdice •i ki'u bo zi lo mentu be li mu ba tcika fa li ze pi'e pa mu •i lo zdani vorme janbe cu nau sance •i lu ju'o da pe lo kagni sei gy sevzi cusku li'u •i gy na'e ru'e dunja ca lo nu lo cmalu tuple cu sutra zenba lo ka dansu •i ro da ze'a smaji •i lu no da gasnu lo nu kalri li'u cu sevzi se cusku la .gregor. noi se cfipu lo na'e racli nu pacna •i ku'i tai lo tcaci lo selfu nixli fau lo nu tinsa stapa cu rarna klama lo vorme gi'e gasnu lo nu kalri •i la .gregor. ca lo nu tirna lo nu co'a rinsa fa lo vitke cu djuno lo du'u ri me ma kau •i ri me lo mi'u krati •i .oi ki'u ma la .gregor. cu se dimna lo nu selfu lo kagni poi bu'u ke'a lo cmalu traji nu na kurji cu zi rinka lo barda traji nu senpi •i xu ro sai lo se jibri cu zunkte lo zekri •i xu no lo se jibri cu ge vrude se lacri gi ge traji zungu lo nu na gasnu lo nu da prali lo kagni ze'a lo cerni cacra be li re gi stace se tcini lo nu na kakne lo nu cliva lo ckana •i xu na banzu fa lo nu minde lo cilre lo nu te preti kei

va'o lo nu lo tai nu preti cu sarcu •i xu .ei lo mi'u krati cu klama •i xu .ei jarco fi lo na'e fuzme lanzu fe lo du'u .ei lo po'o nu lo krati cu pajni cu se lacri fi lo nu lanli lo se senpi cuntu •i gy ja'e mau gi lo nu se fanza lo tai se pensi gi lo nu ca'a jdice cu sevzi renro to'o lo ckana se kai pi ro lo ka vlipa •i lo carmi nu janli cu jalge •i ku'i na mutce savru •i lo nu farlu cu milxe se zunti lo loldi gacri •i ji'a lo trixe cu zmadu lo pu se pensi be la .gregor. lo ka pruni •i ja'e bo lo sance cu na cladu gi'e sampu •i lo po'o stedu cu na banzu se kurji gi'e te darxi •i gy gasnu lo nu carna fa lo stedu kei gi'e mosra ri lo loldi gacri mu'i lo nu gy fengu gi'e cortu •i lu da farlu ne'i tu li'u se cusku lo krati bu'u lo zunle lamji kumfa •i la .gregor. cu troci lo nu se xanri lo nu xu kau lo krati cu su'o roi ba lifri lo simsa be lo nau se lifri be gy •i cumki do'a nai •i ku'i lo krati tai lo nu jursa spuda lo gy preti cu tinsa stapa bu'u lo lamji kumfa gi'e gasnu lo nu sance lo ky skapi cutci •i lo mensi to'o lo pritu kumfa te zu'e lo nu kajde la .gregor. cu to'e cladu cusku lu doi .gregor. lo krati ti zvati li'u •i lu mi djuno sei la .gregor. sevzi cusku li'u •i ku'i na darsi lo nu gasnu lo nu tai cladu fa lo voksa ja'e lo nu lo mensi cu kakne lo nu tirna

ni'o lu doi .gregor. sei lo patfu to'o lo zunle kumfa cu cusku •i lo io krati cu ba'o klama ti gi'e djica lo nu djuno lo du'u ki'u ma kau do na pu se marce lo pa moi trene •i mi'a na djuno lo du'u .ei mi'a cusku ma kau •i ji'a ti io djica lo nu sirji tavla do •i ja'e bo .e'o ko gasnu lo nu kalri fa lo vorme •i ia ti io ba fraxu fi lo nu kalsa fa lo kumfa li'u

ni'o lu .a'o xamgu djedi doi io nanmu po'u la .samsas. sei lo krati cu xendo zunti li'u •i lu la .gregor. na se tcini lo xamgu sei lo mamta fi lo krati ca lo nu lo patfu cu tavla ca'u lo vorme cu cusku •i na se tcini lo xamgu •i ko krici doi io krati •i ia gy va'o lo drata cu na fliba lo nu se marce lo trene •i lo citno cu pensi no na'e bo lo kagni •i mi na ru'e na'e nelci lo nu gy no roi klama lo bartu ca lo vanci •i gy zvati lo tcadu ze'a lo djedi be li bi gi'e ku'i stali ca ro vanci lo zdani •i gy kansa mi'a lo nu zutse ro'e lo jubme •i gy surla tcidu lo karni gi'a tadni lo trene tcika •i gy se zdile lo nu gunka tu'a lo greku •i mu'a ze'a lo re ji'i ci vanci gy sraku zbasu lo cmalu greku •i do ba manci lo nu ri tai melbi •i ri dandu ne'i tu ne'i lo kumfa •i do ba zi viska ca lo nu la .gregor. cu gasnu lo nu kalri •i je'u mi gleki lo nu do ti zvati doi io krati •i ia mi'a fau lo nu kansa no da cu na snada lo nu la .gregor. cu gasnu lo nu kalri fa lo vorme •i gy xarnu mutce •i ju'o gy na se tcini lo xamgu •i to'e ki'u nai bo ca lo ca cerni gy xusra lo natfe li'u

ni'o lu mi zi klama sei la .gregor. cu masno je na'e darsi cusku li'u •i ku'i na'e muvdu te zu'e lo nu na cirko lo valsi pe lo nu tavla •i lu mi ji'a doi io ninmu cu na kakne lo nu ciksi fo lo drata sei lo krati cu cusku •i .a'o na jursa •i ku'i zu'u nai .ei mi xusra lo du'u mi'a poi vecnu cu zabna ja mabla to fancu lo manri toi se funca lo nu sampu bilga lo nu se va'u lo nu vecnu cu ze'i pagre lo milxe nu bilma li'u •i lu .e'e •i e'a pei lo io krati cu klama lo nenri be lo do kumfa sei lo patfu cu na'e surla te preti li'u •i lu nai sei la .gregor. cu cusku li'u •i bu'u lo

zunle kumfa cu dunku smaji •i bu'u lo pritu kumfa lo mensi cu co'a klaku

ni'o ki'u ma lo mensi cu na klama lo drata prenu •i la'a my pu zi cliva lo ckana gi'e za'o na co'a binxo lo dasni •i ki'u ma my klaku •i xu krinu fa lo nu gy na curmi lo nu klama lo nenri fa lo krati •i xu krinu fa lo nu gy se ckape lo nu co'u se jibri ja'e lo nu lo ralju cu za'u re'u kalte lo rirni lo nu te pleji lo slabu se dejni •i la'e di'u nau na'e sarcu raktu •i la .gregor. cu za'o zvati ti gi'e na sai platu lo nu cliva lo lanzu be gy •i gy nau vreta lo loldi gacri •i no da poi da'i djuno fi lo tcini be gy cu jursa cpedu lo nu gy curmi lo nu klama lo nenri fa lo krati •i ku'i ju'o na cumki fa lo nu la .gregor. mu'i lo tai milxe nu na'e sinma cu gau co'u se jibri •i la .gregor. cu jinvi lo du'u zmadu racli fa lo nu da ge curmi lo nu gy surla gi nai jai gau fanza gy fai lo nu klaku gi'e troci lo nu xlura •i ku'i je'u lo nu na birti cu rinka lo nu lo drata cu fraxu gy lo se tarti •i lu doi io nanmu po'u la .samsas. sei lo krati cu cladu krixa •i ma fasnu •i do se marbi lo do kumfa gi'e spuda lo po'o pa slaka gi'e jursa je ke prali claxu ke'e raktu lo rirni be do gi'e ta'o na'e zunkte lo se bilga be do ta'i lo jetnu spaji •i mi krati ge lo rirni be do gi lo ralju be do lo nu cusku di'u •i mi junri lo nu minde cpedu lo klina je cabna ve ciksi •i ue •i mi se spaji •i mi pu jinvi lo du'u do junri je racli nanmu •i do nau simlu lo ka djica lo nu co'a jgira lo cizra rirci •i lo ralcu ca lo ca cerni cu stidi lo cumki ve ciksi be lo nu do lerci •i ra tavla mi lo nu da pu zi co'a lacri do lo nu te pleji lo se vecnu •i je'u mi

na ru'e nupre lo du'u lo tai ve ciksi cu na ka'e jetnu •i ku'i mi nau
zgana lo na'e se jimpe nu do xarnu •i mi cirko lo ka djica lo nu mi
bandu do •i lo tcini be do na sai traji lo ka snura •i mi pu platu lo nu
kansa no da lo nu cusku ro dei •i ku'i mi mu'i lo nu do gasnu lo nu
prali claxu xaksu fa mi lo temci cu na viska lo krinu be lo nu lo rirni
be do na facki •i lo pu ze'a se gunka be do cu to'e mutce mansa •i •i'a
nau na citsi lo nu banli vecnu •i •i'a go'i •i ku'i na zasti fa lo citsi be lo
nu na sai vecnu doi io .samsas. •i .ei na zasti li'u

ni'o lu ku'i doi io krati sei la .gregor. noi fenki gi'e to'e morji ro
drata ri'a lo nu se fanza cu krixaxa •i mi ba zi gasnu lo nu kalri fa lo
vorme •i lo milxe te bilma no'u lo nu cfipu se cinmo cu fanta lo nu mi
binxo lo sanli •i mi za'o zvati lo ckana gi'e ku'i nau za'u re'u carmi
cikna •i mi zi cliva lo ckana •i .e'o zi denpa •i mi za'o na se tcini lo
xamgu poi mi pu krici •i ku'i zenba lo ka xamgu •i ue lo prenu cu ka'e
se gunta lo simsa •i mi ca lo purci lamci vanci cu se tcini lo banzu
xamgu •i lo rirni be mi cu djuno •i sa'e mi ca lo purci lamji vanci cu
xa'o milxe jijnu •i ju'o mi pu simlu fi da •i .u'u ki'u ma mi na pu gasnu
lo nu da djuno bu'u lo kagni •i ku'i je'u da ro roi jinvi lo du'u da ba
pagre lo te bilma se cau lo nu nitcu lo nu stali •i .e'o doi io krati ko
kekti lo rirni be mi •i no da mukti lo nu do pante mi •i mi no roi se
tavla fi la'e di'u •i ju'o cu'i do na ba'o tcidu lo ro moi ke se vecnu se
cpedu poi mi benji •i .ai mi se marce lo trene pe li bi •i lo surla cacra
be li so'u cu ba'o rinka lo nu mi tsali •i ko na denpa stali doi io krati •i

mi mi'u ba zi zvati lo kagni •i .e'o ko gasnu lo nu djuno kei gi'e rinsa
se ka'i mi lo ralju li'u

ni'o la .gregor. ca lo nu juxre je sutra bacru ro di'u gi'e ja'a ru'e
djuno lo du'u xusra ma kau cu ba'o frili zenba lo ka jibni lo se dacru to
la'a jalge lo ckana se zajba toi •i gy nau troci lo nu binxo lo sanli fau lo
nu se sarji lo se dacru •i je'u gy djica lo nu gasnu lo nu kalri fa lo
vorme •i gy stace djica lo nu se viska gi'e tavla lo krati •i gy kucli lo
du'u lo drata noi tai djica lo nu viska gy cu ba cusku ma kau ca lo nu
zvati gy •i va'o lo nu ra se jenca zo'u la .gregor. na sai fuzme gi'e
kakne lo nu surla •i ku'i ji'a va'o lo nu ra rarna frati zo'u gy na te
mukti lo nu xanka kei gi'e ji'a sai je'u kakne lo nu sutra gi'e zvati lo
trene stuzi ti'u li bi

ni'o pa mai gy cu so'o roi sakli lo xutla se dacru •i ku'i ro mai gy
tsali catke gy gi'e stali lo ka sanli •i gy xa'o na sai jundi lo nu cortu lo
betfu kei noi ku'i mutce cpina •i ba bo gy curmi lo nu gy farlu lo trixe
be lo jibni stizu noi gy jgari lo korbi be ke'a lo cmalu tuple •i gy ta'i
la'e di'u cu snada lo nu sevzi jitra •i gy binxo lo smaji te zu'e lo nu
tirna lo krati

ni'o lu xu do jimpe su'o valsi sei lo krati fo lo rirni cu te preti •i xu
tu tarti lo nu mi'o bebna li'u •i lu .uu sai sei lo mamta cu klaku krixax
•i ju'o cu'i tu jursa bilma •i je mi'o tu tunta •i ju'i .greten. ju'i .greten.
sei my krixax li'u •i lu re'i mamta sei lo mensi to'o lo drata mlana cu
cusku li'u •i lo nu tavla simxu cu pagre lo kumfa pe la .gregor. •i lu

.e'i ko klama lo mikce •i la .gregor. cu bilma •i ko sutra lo nu gasnu lo nu lo mikce ti klama •i xu do pu zi tirna lo voksa be la .gregor. li'u •i lu voksa lo danlu li'u cu se cusku lo krati se pi'o lo voksa poi mutce mleca lo se krixu be lo mamta lo ka cladu

ni'o lu ju'i .anas. ju'i .anas. sei lo patfu fa'a lo jukpa kumfa pa'o lo rinsa kumfa fau lo nu gasnu lo nu lo xance cu simxu lo ka janli cu cusku •i ko zi gasnu lo nu lo ckiku certu ti klama li'u •i lo re nixli cu bajra fi'o se sance lo skaci pa'o lo rinsa kumfa to ue ta'i ma lo mensi cu snada lo nu tai sutra lo nu binxo lo dasni toi gi'e gasnu lo nu mulno kalri fa lo vorme be lo zdani •i na tirna lo nu da gasnu lo nu ganlo fa lo vorme •i la'a curmi lo nu ri stali lo ka kalri kei tai lo nu ta'e fasnu bu'u lo zdani poi bu'u ke'a lo betri cu fasnu

ni'o ku'i la .gregor. cu ba'o zenba lo ka surla •i .a'u lo gy valsi cu na'e se jimpe to'e ki'u nai lo nu ri simlu fi gy fe lo ka banzu klina •i zmadu lo purci lo ka klina •i ju'o cu'i la'e di'u cu jalge lo nu lo kerlo cu binxo lo se tcaci •i do'a nai da nau krici lo du'u lo xlali cu tcini la .gregor. •i da bredi lo nu sidju •i lo jdice je birti se ckaji be lo pa moi se platu cu pluka gy •i gy za'u re'u cinmo lo ka cmima lo remna cecmu •i gy pacna lo mutce xamgu je spaji jalge be tu'a lo mikce jo'u lo ckiku certu vu'o noi gy na satci ke pensi fendi ke'a •i gy te zu'e lo nu se voksa lo traji cumki klina ca lo ba zi vajni nu tavla cu milxe kafke •i ku'i gy lo nu mutce milxe cu troci ki'u lo nu la'a lo ji'a sai tai savru cu frica lo remna voksa lo ka sance •i gy na lacri gy lo nu kakne lo nu

sanji la'e di'u •i ro da bu'u lo lamji kumfa cu smaji •i ju'o cu'i lo rirni
cu kansa lo krati lo nu zutse re'o lo jubme gi'e to'e cladu casnu •i ju'o
cu'i ro da lamji lo vorme gi'e tirna

ni'o la .gregor. cu masno binxo lo jibni be lo vorme si'u lo stizu •i
gy to'e jgari ri gi'e renro gy lo vorme •i gy stali lo ka sanli kei gi'e se
sarji vy to lo jipno be lo cmalu tuple cu marji lo snipa toi gi'e ze'i surla
bu'u vy mu'i lo nu pu nandu zajba •i ba bo gy co'a pilno lo moklu lo
nu gasnu lo nu carna fa lo ckiku noi zvati lo stela •i ui nai za'a gy na
se denci sa'e to pilno ma lo nu jgari lo ckiku toi •i ku'i zu'u nai lo
xedja cu vlipa li'a •i gy si'u ra cu snada lo nu gasnu lo nu to'e cando fa
lo ckiku •i gy na sanji lo nu ju'o gy xrani gy •i lo bunre litki cu cliva lo
moklu gi'e flecu lo ckiku gi'e dargu carvi lo loldi

ni'o lu ko tirna sei lo krati bu'u lo lamji kumfa cu cusku •i tu gasnu
lo nu carna fa lo ckiku li'u •i la'e di'u cu se smuni lo barda mukti la
.gregor. •i ku'i ro da .ei xlura gy •i ji'a sai .ei lo patfu jo'u lo mamta cu
go'i •i lu .e'e doi .gregor. sei .ei krixax •i .e'e ko co'e lo stela li'u •i gy fau
lo nu te sidbo lo nu ro da cu pacna zgana lo nu gy nandu troci cu
carmi jgari lo ckiku se kai ro lo ka tsali poi gy snada lo nu crepu ke'a
•i la .gregor. ca'o lo nu lo ckiku cu carna cu dansu sruri lo stela •i gy
nau sanli si'u lo po'o moklu •i gy slilu lo se nitcu lo nu dandu lo ckiku
kei jo'u lo nu za'u re'u danre fa'a lo nenri se pi'o pi ro lo junta be lo
xadni •i lo kinli sance be lo stela noi uo co'a kalri cu rinka lo nu la
.gregor. cu mulno cikna •i gy fau lo nu condi vasxu cu sevzi cusku

lu .o'a mi pu na nitcu lo ckiku certu li'u gi'e punji lo stedu lo vorme batke te zu'e lo nu gasnu lo nu mulno kalri fa lo vorme

ni'o lo vorme se ja'e lo tadjì be lo nu gasnu lo nu kalri cu nau banzu kalri gi'e ku'i za'o mipri la .gregor. •i pa mai .ei gy masno carna lo vorme tanbo •i gy nitcu lo nu mutce kurji kei lo nu na juxre farlu lo trixe be gy bu'u lo vorme be lo kumfa •i gy za'o pensi lo nu ta'i ma kau zukte lo tai nandu kei gi'e na kakne lo nu jundi lo drata •i ca bo gy tirna lo nu lo krati cu cladu bacru zo ua poi sance tai lo nu lo brife cu siclu •i ca bo ji'a gy viska lo nu ky noi traji jibni lo vorme cu gasnu lo nu gacri fa lo xance lo kalri moklu kei gi'e klama lo trixe tai lo nu lo na'e se viska bapli cu ru'i catke ky •i lo mamta noi lo nu lo krati cu zvati cu na pu fanta lo nu ke'a se kerfa lo kluza je sanli cu pa mai catlu lo patfu fau lo nu lo xance cu lamji simxu kei gi'e za'u mai re roi stapa fa'a la .gregor. gi'e farlu lo loldi fau lo nu lo flira cu se mipri lo tatra kei fi'o se midju lo skaci noi preja lo sruri •i lo patfu cu gasnu lo nu ganlo fa lo xance kei fau lo nu kajde frumu kei tai lo nu djica lo nu catke la .gregor. ja'e lo nu xruti lo nenri be lo kumfa •i py senpi catlu lo sruri bu'u lo ralju kumfa •i ba bo py gasnu lo nu gacri fa lo xance lo kanla kei gi'e tai klaku ja'e lo nu lo rotsu cutne cu desku

ni'o la .gregor. cu na klama lo nenri be lo kumfa •i ba'i bo gy se sarji lo midju be lo vorme tanbo poi za'o ganlo ja'e lo nu da ka'e viska lo po'o xadba be lo gy xadni be'o jo'u lo stedu noi salpo gi'e catlu fa'a lo drata •i lo donri cu ba'o zenba lo ka se gusni •i ze'o lo klaji ka'e

viska lo pagbu be lo ragve dinju noi xekri gi'e cimni •i ri spita gi'e se canko lo dikni noi jursa zunti lo crane bitmu •i za'o carvi •i ku'i ru'i nai go'i fa lo barda dirgo lo dertu •i lo palta pe lo cerni sanmi cu so'i mei preja lo jubme ki'u lo nu lo patfu cu jinvi lo du'u lo cerni sanmi cu ralju lo djedi sanmi •i lo nu py tcidu lo vrici karni cu ta'e rinka lo nu lo cerni sanmi cu cacra li so'o •i zvati lo fapro bitmu fa lo pixra be la .gregor. pe lo cedra be lo nu bilni selfu •i ra jvinu lo nu gy dasni lo jatna taxfu gi'e surla cisma fau lo nu lo xance cu cpana lo xarci kei gi'e minde cpedu lo nu sinma lo sanli tadji jo'u lo manfo taxfu •i lo vorme be lo rinsa kumfa cu kalri •i ji'a lo vorme be lo zdani cu kalri •i ja'e bo ka'e viska lo serti tsina jo'u lo fanmo be lo serti poi dargu lo cnita

ni'o lu .a'e sei la .gregor. noi prane sanji lo nu gy po'o cu stali lo ka surla cu cusku •i .ai mi zi binxo lo dasni gi'e gasnu lo nu bakfu lo bukpu mupli kei gi'e co'a litru •i .au pei do curmi lo nu mi cliva •i .a'e doi io krati do viska lo nu mi na xarnu gi'e ja'a nelci lo nu gunka •i lo nu litru cu rinka lo nu tatpi •i ku'i mi na kakne lo nu jmive se cau lo nu litru •i do klama ma doi io krati •i xu go'i lo kagni •i xu do ba skicu ro da fo lo fatci •i cumki fa lo nu da ca lo cabna cu na kakne lo nu gunka •i ba bo ku'i da morji lo nu da pu selfu kei gi'e jinvi lo du'u ju'o da ba lo nu bancu lo nabmi cu gunka se kai lo ka fuzme je denmi poi zenba •i mi dejni lo mutce lo ralju •i ia do djuno •i zu'u nai mi kurji lo rirni jo'u lo mensi •i mi se nabmi gi'e ku'i ba snada lo nu bancu •i ku'i ko na gasnu lo nu zenba lo ka nandu •i ko bandu mi

bu'u lo kagni •i ka'u da na prami lo litru vecnu •i da jinvi lo du'u lo litru vecnu cu jerna lo mutce jdini gi'e frili jmive •i •i'a no steci cu mukti lo nu da condi zmadu pensi lo tai mabla se jinvi •i ku'i do doi io krati cu zmadu lo drata se jibri lo ka drani viska lo ro vanci •i je'u .o'e go'i lo mi'u ralju noi ke'a ki'u lo nu ponse lo kagni cu frili cenba lo ka jinvi kei to'e se va'u lo se jibri •i ji'a do djuno lo du'u lo litru vecnu noi ze'a pi so'a lo nanca cu darno lo kagni cu frili binxo lo se gunta be lo nu mabla cusku jo'u lo cunso jo'u lo nu na'e krinu pante •i lo litru vecnu cu na'e sai kakne lo nu sevzi bandu kei ki'u lo nu so'e roi na co'a sanji •i ba bo fau lo nu tatpi gi'e mo'u litru cu ganse fi lo sevzi rectu bu'u lo zdani fe lo jalge be lo na'e se jimpe •i doi io krati .e'o ko na cliva se cau lo nu do cusku lo valsi poi jarco lo nu do jinvi lo du'u mi milxe do'a nai drani li'u

ni'o ku'i lo krati cu ba'o carna ca lo pa moi valsi pe la .gregor. •i ky ga'u lo janco noi sukxa to'e cando cu nau catlu la .gregor. gi'e frumu fau lo nu lo ctebi cu cmana tarmi •i ky na ze'i ji'a sai cando ca lo nu la .gregor. cu tavla •i ky se cau lo nu sisti lo nu catlu gy cu sakli fa'a lo vorme •i ku'i masno go'i tai lo nu da mipri to'e curmi lo nu ky cliva lo kumfa •i ky nau zvati lo rinsa kumfa •i lo nu tai sukxa vimcu lo jamfu lo ralju kumfa cu stidi lo si'o lo jamfu cnita cu jelca •i ky bu'u lo rinsa kumfa cu gasnu lo nu preja fa lo pritu birka fa'a lo serti tai lo nu bu'u ri lo nu snura poi bancu be lo rarna cu denpa

ni'o la .gregor. cu jimpe lo du'u .ei gy na sai curmi lo nu lo krati cu cliva fau lo nu ky tai cinmo se tcini .i la'e di'u cu ckape lo nu gy se jibri bu'u lo kagni .i lo rimi cu na drani jimpe ro la'e di'u .i ra ze'u lo nanca cu binxo lo birti be lo du'u la .gregor. cu snura se jibri bu'u lo kagni co'u lo jmive fanmo .i ji'a lo cabna raktu cu rinka lo nu ra na pensi lo balvi .i ku'i la .gregor. ja'a pensi lo balvi .i .ei gasnu lo nu lo krati cu stali gi'e surla gi'e se xlura gi'e ro mai se trina .i lo balvi pe la .gregor. jo'u lo lanzu cu fancu la'e di'u .i .au lo mensi ti zvati .i my to'e bebna .i my xa'o klaku ca lo nu la .gregor. cu za'o surla vreta lo trixe .i ju'o lo krati noi mutce nelci lo ninmu cu da'i se xlura my .i da'i my gasnu lo nu ganlo fa lo vorme be lo zdani .i da'i my bu'u lo rinsa kumfa cu snada lo nu gasnu lo nu ky co'u terpa .i ku'i lo mensi ti na zvati .i je la .gregor. cu bilga lo nu zukte

ni'o gy se cau lo nu pensi lo movdu se kakne poi za'o na se slabu ku'o jo'u lo nu la'a lo gy valsi cu na pu se jimpe cu cliva lo vorme tanbo gi'e sakli pa'o lo kalri .i gy platu lo nu klama lo krati noi fenki jgari lo tsina garna lo re xance .i ku'i gy fau lo nu sisku lo sarji cu zi farlu lo so'i cmalu tuple gi'e milxe krixaxa .i ba zi bo gy pa re'u lo ca cerni cu ganse lo xadni zabna .i lo cmalu tuple cu cpana lo jdari loldi gi'e prane tinbe fi'o gleki zgana gy .i ji'a sai lo cmalu tuple cu troci lo nu bevri gy lo se djica be gy .i la .gregor. cu nau krici lo du'u lo stodi danfu be ro lo xlali cu jibni .i gy ri'a lo rinju nu movdu cu slilu gi'e stali lo loldi ne'a je ca'u lo mamta .i ca bo my noi simlu lo ka jinru lo

sevzi se pensi cu plipe lo galto fau lo nu ge lo birka cu preja gi lo degji
cu mutce sepli simxu kei gi'e krixu lu ko sidju •i .e'o sai ko sidju li'u •i
my ralte lo stedu lo ka salpo kei tai lo nu my djica lo nu zabna zmadu
viska la .gregor. •i ku'i my fi'o natfe la'e di'u cu sutra klama lo trixe •i
my to'e morji lo du'u ti'a my lo jubme cu se cpana lo sanmi palta •i
my ca lo nu to'e cliva lo jubme cu sutra zutse ri tai lo nu fenki •i my
simlu lo ka na sanji lo nu re'o my lo ckafi pe lo vreta patxu cu flecu
farlu lo loldi gacri

ni'o lu doi mamta doi mamta li'u cu se cusku la .gregor. se pi'o lo
to'e cladu voksa •i gy catlu my gi'e ze'i to'e morji lo krati gi'e ku'i na
snada lo nu rivbi ca lo nu viska lo ckafi poi ca'o farlu kei lo nu gasnu
lo nu so'o roi kalri ce'o mulno fa lo xedja lo kunti •i lo mamta ca lo nu
viska gy cu za'u re'u krixu gi'e bajra cliva lo jubme gi'e farlu lo birka
be lo patfu noi bajra fa'a my •i ku'i la .gregor. cu nau claxu lo temci
poi ze'a ke'a jundi lo rirni •i lo krati cu xa'o zvati lo serti •i ky fau lo
nu lo flira jipno cu cpana lo garna cu ro re'u catlu •i la .gregor. cu to'e
jabre te zu'e lo nu birti traji kavbu ky •i ju'o lo krati cu smadi da •i ky
pa roi plipe ga'u so'i te serti gi'e canci •i ku'i bacru zo ii noi se tirna
ve'a pi ro lo serti •i ui nai za'a lo nu lo krati cu bajra cliva cu mulno
cfipu lo patfu noi pu ve karbi surla •i lo patfu se ba'i lo nu jersi lo
krati gi'a na zunti lo nu la .gregor. cu jersi cu jgari fi lo pritu xance fe
lo grana pe lo krati zi'e noi ky pu to'e lebna ke'a jo'u lo mapku jo'u lo
kosta lo stizu •i py jgari fi lo zunle xance fe lo barda karni poi cpana

lo jubme •i py fau lo nu tikpa lo loldi gi'e pilno lo grana jo'u lo karni
cu co'a gasnu lo nu klama fa la .gregor. fa'a lo trixe lo gy kumfa •i no
da jalge lo nu la .gregor. cu pikci •i ji'a na se jimpe •i lo nu gy cumla
gasnu lo nu carna fa lo stedu cu na fanta lo nu lo patfu cu vlipa zenba
tikpa

ni'o lo mamta cu ze'o gasnu lo nu kalri fa lo canko to'e ki'u nai lo
lenku tcima •i my salpo fa'a lo bartu gi'e gasnu lo nu gacri fa lo xance
lo flira •i lo vacri cu vlipa flecu lo kumfa lo serti lo klaji •i lo canko
murta cu vofli •i desku fa lo karni poi cpana lo jubme •i lo boxfo cu
vofli sakli lo loldi •i lo patfu cu na sisti lo nu gunta gy gi'e fenki siclu
•i ku'i la .gregor. cu za'o na certu lo ka cadzu fa'a lo trixe •i je'u gy
mutce masno muvdu •i la .gregor. va'o lo nu da'i kakne lo nu carna cu
da'i ba zi zvati lo gy kumfa •i ku'i gy terpa lo nu lo patfu cu fengu lo
nu gy masno carna •i ro roi ckape fa lo nu morsi darxi fo lo trixe .a lo
stedu •i ro mai no drata danfu cu zasti •i gy dunku sanji lo nu gy fau
lo nu cadzu fa'a lo trixe cu na kakne lo ji'a sai nu ralte lo farna •i gy
fau lo nu ru'i terpa ke mlana catlu lo patfu cu co'a carna se kai lo ka
sutra poi traji cumki zi'e noi je'u ka mutce masno •i ju'o cu'i lo patfu
cu zgana lo nu gy vrude djica •i py ge po'o nai na zunti lo nu troci gi
ji'a so'o roi sazri gy to'o lo darno se pi'o lo jipno be lo grana lo nu gy
carna

ni'o .au lo patfu cu co'u fanza siclu •i la'e di'u rinka lo nu la
.gregor. cu mulno to'e jundi •i gy ca lo nu na'e ru'e mo'u carna gi'e ru'i

tirna lo se siclu cu srera gi'e milxe xruti carna •i uo ui lo stedu cu nau crane lo vorme •i ku'i za'a lo xadni cu dukse lo ka ganra kei lo nu pagre •i li'a lo patfu va'o lo ca cinmo tcini cu na sai te sidbo fi lo nu gasnu lo nu kalri fa lo drata ke vorme tanbo te zu'e lo nu friti la .gregor. lo banzu canlu •i stodi sidbo fa lo po'o nu .ei la .gregor. cu nenri lo gy kumfa rai lo ka sutra •i ji'a py va'o no da cu da'i curmi lo pluja se zunkte poi la .gregor. cu nitcu ke'a lo nu sanli binxo gi'e tai pagre lo vorme •i py catke la .gregor. fa'a lo crane fau lo nu savru zenba kei tai no da zunti •i nau na sance ti'a la .gregor. tai lo nu lo po'o patfu cu se voksa •i nau na xalbo •i la .gregor. cu setca gy lo vorme •i ju ma kau fasnu •i pa lo xadni mlana cu se lafti •i gy kruca lo kevna be lo vorme •i lo mlana be gy cu mulno se xrani •i lo blabi vorme cu se barna lo rigni •i gy rinju gi'e na kakne lo nu muvdu se cau lo nu da sidju •i lo cmalu tuple pe lo pa mlana cu dandu bu'u lo vacri gi'e desku •i lo me lo drata mlana moi cu stali lo ka cortu se danre bu'u lo loldi •i lo patfu cu tsali catke fa'a lo trixe •i la'e di'u va'o lo cabna cu rinka lo nu la .gregor. cu fatci surla •i gy binxo lo condi nenri be lo kumfa fau lo nu carmi ke ciblu cirko •i lo vorme cu gau ganlo se pi'o lo grana •i ba bo uo smaji

ni'o re mo'o

ni'o co'u lo co'a vanci la .gregor. cu condi sipna tai lo nu cirko lo ka sanji •i la'a gy va'o lo ji'a sai nu da'i na se fanza cu ba zi da'i binxo lo cikna •i ki'u bo gy ganse lo nu gy banzu se cikre je surla •i ku'i lo nu gy binxo lo cikna cu simlu fi gy fe lo ka se rinka lo nu sutra stapa jo'u lo sance be lo nu da ralci gasnu lo nu ganlo fa lo vorme be lo rinsa kumfa •i lo dikca gusni pe to'o lo klaji cu va je vu kandi se minra lo kumfa drudi jo'u lo galto pagbu be lo nilce •i ku'i lo dizlo noi la .gregor. ke'a zvati cu manku •i gy fau lo nu juxre pencu fi lo te ganse noi gy nau cilre lo nu gy te vamji cu masno cpare lo loldi lo vorme te zu'e lo nu zgana lo nu ma kau pu fasnu bu'u vy •i lo zunle mlana be gy cu simsa lo pa mei je clani ke kanro ve xrani noi to'e pluka lacpu gy gi'e rinka lo nu gy bilga lo nu na'e lanxe cadzu fi lo re linji be lo tuple be gy •i za'a pa lo cmalu tuple cu jursa se xrani ca lo cerni fasnu to lo nu pa po'o tuple cu se xrani cu na ru'e simlu lo ka censa makfa toi gi'e jmive claxu se lacpu •i gy ca lo nu to'e cliva lo vorme cu sanji lo nu da poi ke'a gy xlura ke'a cu panci lo ka'e se citka •i ti se zvati lo baktu poi culno lo titla ladru poi lo spisa be lo nanba cu fula ke'a •i gy na ru'e klaku fi lo nu gleki •i ki'u bo gy nau xagji se mau lo nu no'a ca lo cerni •i gy zi setca lo stedu lo ladru fe'e co'u na'e ru'e bo lo gapru be lo kanla •i ku'i gy ba zi vimcu ra fau lo nu badri •i ge po'o nai lo nu citka cu nandu gy ri'a tu'a lo ralci ke zunle mlana to gy kakne lo nu citka kei va'o lo po'o nu pi ro lo xadni cu nandu vasxu sidju toi gi ji'a

lo ladru noi pu ro roi traji lo ka pluka gy zi'e noi la'a lo mensi mu'i la'e di'u cu bevri cu nau na pluka gy •i gy fau lo nu na ru'e se rigni cu cliva lo baktu gi'e cpare xruti lo midju be lo kumfa

ni'o bu'u lo ralju kumfa sei la .gregor. pa'o lo fenra be lo vorme cu viska se'u lo gapci te gusni cu cikna •i lo patfu ca lo ca tcika cu ta'e voksa tcidu se va'u lo mamta gi'e su'o roi go'i se va'u lo ji'a mensi vau lo vanci karni •i ku'i no sance cu nau se tirna •i ju'o cu'i lo tai tcaci poi nu cladu voksa tcidu zi'e noi lo mensi cu ro roi xatra skicu cu mulno se cirko ca lo purci lamji temci •i ro da ca'o smaji ru'u gy to'e ki'u nai lo nu ju'o lo zdani cu na kunti •i lu ua lo lanzu cu surla jmive sei la .gregor. cu sevzi cusku li'u •i gy ca lo nu stodi catlu lo manku poi crane gy cu mutce jgira lo nu pu kakne lo nu dunda fi lo rirni jo'u lo mensi fe lo nu xabju lo tai melbi zdani •i ku'i ma ba fasnu va'o lo nu da'i lo cabna cu betri fanmo lo nu surla jo'u lo nu se xamgu jo'u lo nu se mansa •i la .gregor. te zu'e lo nu na pensi lo simsa cu cuxna lo nu co'a movdu gi'e ru'i cpare fi ro da ve'a lo kumfa

ni'o pa roi lo clani ke nichte murse lo cmalu te sepli cu binxo lo kalri bu'u pa lo mlana vorme .e ba bo lo drata •i lo re te sepli cu zi xruti lo ka ganlo •i la'a da nitcu lo nu klama lo nenri kei gi'e ku'i mutce senpi •i ba bo la .gregor. cu zvati lo crane be lo vorme be lo ralju kumfa fau lo nu ba'o jdice lo nu gasnu lo nu klama fa lo senpi vitke lo nenri •i gy djica lo nu do'a nai facki lo du'u ra mo kau •i ku'i lo vorme cu na za'u re'u binxo lo kalri •i la .gregor. cu prali claxu denpa •i ca lo pu cerni

ca lo nu lo vorme cu stela ganlo zo'u ro da djica lo nu klama lo nenri
be lo gy kumfa •i nau ku ca lo nu ge gy ba'o gasnu lo nu kalri fa lo
vorme gi ju'o lo drata vorme cu gau binxo lo kalri ca lo donri zo'u no
da ti klama •i ji'a lo ckiku cu ba'o se setca fi lo stela to'o lo bartu

ni'o ca lo lerci nichte lo te gusni cu gau binxo lo cando bu'u lo ralju
kumfa •i nau frili fa lo nu birti lo du'u lo rini jo'u lo mensi cu ze'a pu
ca'o stali •i ki'u bo kakne lo nu prane tirna lo nu lo ci mei cu nau ralci
cadzu cliva •i ja'o la'a no da co'u lo balvi lamji cerni cu ba klama lo
nenri be lo kumfa pe la .gregor. •i gy kakne lo nu pilno lo mutce temci
lo nu pensi se cau lo nu da fanza kei lo nu ta'i ma kau za'u re'u ganzu
lo gy nu jmive •i ku'i lo galtu drudi kumfa noi simlu lo ka kunti zi'e
noi gy bilga lo nu ca'o vreta lo loldi be ke'a cu se terpa gy •i gy fliba lo
nu facki lo du'u ma kau rinka la'e di'u •i ki'u bo gy pu xabju lo kumfa
ze'a lo nanca be li mu •i gy fau lo nu xadba na'e sanji gi'e milxe ckeji
cu sutra klama lo cnita be lo sofa •i lo calku cu milxe se tagji •i je na
kakne lo nu lafti lo stedu •i ku'i gy zi mutce kufra gi'e xenru lo po'o
nu lo xadni be gy cu dukse lo ka ganra kei lo nu mulno cnita lo sofa

ni'o gy ti stali ze'a pi ro lo nichte •i gy pagbu pagre ri fau lo nu jinru
lo nu xadba sipna noi lo nu xagji cu so'i roi suksa lebna gy ke'a •i je
pagbu pagre fau lo nu jbini lo raktu jo'u lo cfipu se pacna •i ro la'e
di'u bevri gy lo nu jinvi lo du'u .e'i gy nau surla tarti gi'e gasnu si'u lo
nu lo lanzu cu mutce xendo kei lo nu ly renvi lo fanza poi la .gregor.
fau lo cabna se tcini cu na kakne lo nu rivbi lo nu cupra ke'a

ni'o ca lo clira cerni ca lo za'o na ru'e nictē zo'u la .gregor. kakne lo nu cipra fi lo pu zi se jdice •i lo mensi noi na'e ru'e mulno dasni cu gasnu lo nu kalri fa lo vorme be lo rinsa kumfa kei gi'e kucli catlu lo nenri •i my na'e zi facki tu'a gy •i ku'i my ca lo nu facki lo du'u gy cnita lo sofa to .o'u nai ia gy zvati da •i ju'o na vofli cliva toi cu tai terpa ja'e lo nu my fau lo nu na kakne lo nu sevzi jitro cu gasnu to'o lo bartu lo nu xruti ganlo fa lo vorme •i ku'i my tai lo nu xenru cu zi za'u re'u gasnu lo nu kalri kei gi'e ralci cadzu klama lo nenri tai lo nu gy jursa bilma gi'a fange •i la .gregor. cu ba'o gasnu lo nu crane fa lo stedu fe'e co'u lo na ru'e korbi be lo sofa kei gi'e zgana my •i .a'u xu my ba sanji lo nu gy na lebna lo ladru gi'e co'e ki'u nai lo nu claxu lo nu xagji •i xu my ba bevri lo drata cidja poi mapti zmadu •i va'o lo nu da'i my na sevzi sanji zo'u la .gregor. cu cuxna ge lo nu gy binxo lo morsi ri'a lo nu xagji gi nai lo nu gy gasnu lo nu my jundi la'e di'u •i to'e mu'i nai bo gy mutce djica lo nu cliva lo cnita be lo sofa gi'e renro gy lo jamfu be lo mensi gi'e pikci my lo nu my bevri lo xamgu be fi lo ka se citka •i ku'i lo mensi cu se spaji zgana lo culno baktu noi pi so'u lo ladru cu ba'o farlu lo sruri be ke'a •i my lafti lebna lo baktu lo loldi se pi'o ge nai lo xance gi lo bukpu gi'e bevri lo baktu lo bartu •i la .gregor. cu mutce kucli lo du'u my ba basti bevri ma kau kei gi'e vrici sruma •i gy na smadi lo du'u lo xendo mensi cu ca'a zukte ma kau •i my te zu'e lo nu cipra lo ka ma kau kukte ce'u kei gy cu bevri lo so'i te cuxna noi preja punji ke'a lo to'e cnino karni •i lo xadba fusra stagi •i lo bongu noi festi lo vanci sanmi gi'e se sruri lo blabi sanso noi ba'o

binxo lo jdari •i lo so'o makcu ke se vanju grute jo'u lo so'o narge •i lo cirila noi la .gregor. pu za lo djedi be li re cu skicu ke'a fo lo ka na'e ka'e se citka •i lo nanba spisa •i lo drata ke nanba spisa noi se cpana lo matne jo'u lo silna •i ji'a my jmina lo bi'u nai baktu noi la'a co'a lo cabna cu se dimna la .gregor. zi'e noi vasru lo djacu •i my mu'i lo nu xendo gi'e djuno lo du'u la .gregor. na ba citka ca'u my cu zi cliva gi'e ji'a sai pilno lo ckiku te zu'e lo nu la .gregor. cu sanji lo nu gy kakne lo nu tai surla se kai lo ka se djica •i lo cmalu tuple be la .gregor. cu xanka ca lo nu binxo lo jibni be lo nu citka •i za'a lo ve xrani cu ba'o mo'u kanro binxo •i ki'u bo gy ganse no sai lo fanza •i gy manci gi'e pensi lo nu gy pu za lo masti cu xrani katna lo degji noi pu zi lo djedi be li re cu za'o mutce cortu •i lu xu mi nau mleca ganse sei gy pensi li'u

ni'o gy carmi sakci lo cirila noi pu zi traji lo ka vlipa trina gy •i gy fau lo nu lo kanla cu klaku lo dirgo lo ka gleki cu porsu je sutra citka lo cirila jo'u lo stagi jo'u lo sanso •i zu'u nai lo vifne cidja cu na kukte gy •i ji'a sai gy na kakne lo nu renvi lo panci be ra kei gi'e gasnu lo nu milxe darno fa lo se citka se djica •i lo mensi za ba lo nu gy mo'u citka gi'e stali lo ka vreta lo mintu diklo cu gasnu fi'o se sinxa lo nu .e'i gy cliva kei lo nu masno carna fa lo ckiku •i la'e di'u rinka lo nu gy se jenca kei to'e ri'a nai lo nu gy xa'o xadba sipna •i gy sutra lo nu mipri ni'a lo sofa •i ku'i nandu gy fa lo nu stali lo cnita be lo sofa ze'a lo ji'a sai tordu temci poi lo mensi cu zvati lo kumfa •i ki'u bo ri'a lo mutce

cidja lo betfu cu milxe punli •i je bo gy ja'a ru'e kakne lo nu vasxu ve'i lo cmalu canlu •i gy fau lo so'o nu na kakne lo nu vasxu cu viska se pi'o lo milxe punli kanla lo nu lo mensi noi se xanri no da pe la'e di'u cu vimcu se pi'o lo burcu ge po'o nai lo te vimcu gi ji'a lo cidja poi la .gregor. na pu pencu zi'e noi simlu lo ka xa'o na ka'e se pilno •i my sutra renro ro da lo nenri be lo baktu noi my pilno lo mudri gacri lo nu by ganlo •i ba bo my bevri ro da lo bartu •i la .gregor. ba lo nu my carna cu zi cliva lo cnita be lo sfofa gi'e tisna gi'e preja

ni'o ta'i la'e di'u la .gregor. cu ta'e te dunda lo djedi cidja •i go'i pa roi lo cerni ca lo nu lo rirni jo'u lo selfu nixli cu za'o sipna •i re re'u go'i ba lo midju donri sanmi ki'u lo nu ge lo rirni cu ze'i sipna gi lo mensi cu minde lo selfu nixli lo nu klama da •i ju'o lo rirni na djica lo nu la .gregor. cu binxo lo morsi ri'a lo nu xagji •i ku'i ju'o cu'i na kakne lo nu renvi lo nu facki fi lo citka tcaci be gy fe lo zmadu be lo se cusku be lo mensi •i ju'o cu'i lo mensi cu djica lo nu bandu lo rirni lo cmalu se betri kei mu'i lo nu je'u ry lifri lo banzu

ni'o la .gregor. na djuno lo du'u da cusku ma kau lo mikce jo'u lo ckiku certu te zu'e lo nu gau cliva lo zdani ca lo pa moi cerni •i lo nu no da kakne lo nu jimpe gy cu rinka lo nu no da .e nai ji'a sai lo mensi cu jinvi lo du'u gy ja'a kakne lo nu jimpe lo drata •i gy ca lo nu lo mensi cu zvati lo gy kumfa cu bilga lo nu se mansa lo nu tirna lo nu my so'o roi cu vasxu cmoni gi'e pikci lo censa prenu •i ba ku po'o ca lo nu gy milxe se tcaci ro da to li'a na ka'e jinvi lo du'u gy ba mulno se

tcaci toi zo'u gy su'o roi kavbu lo pinka noi xendo se cupra gi'a simlu lo ka co'e •i lu tu ja'a se kukte ca lo cabna djedi li'u se cusku my ca lo nu la .gregor. cu ba'o mutce citka •i va'o lo fapro noi zenba lo ka cafne zo'u my ta'e na'e ru'e badri cusku lu ro da te vimcu ca lo cabna djedi li'u

ni'o la .gregor. cu pacu no nuzba ta'i lo sirji gi'e ku'i tirna su'o da poi se krasi lo lamji kumfa •i gy ca lo nu pa roi tirna lo voksa cu zi bajra fa'a lo mapti vorme gi'e mulno xadni binxo lo tagji be ri •i ca lo pa moi temci no nu casnu to •i'a mipri toi cu na srana gy tai da •i ze'a lo djedi be li re cu tirna ca lo sanmi lo nu casnu lo du'u .ei da nau tarti ma kau •i ku'i ca lo ji'a jbini be lo sanmi cu casnu lo mintu •i ro roi ku su'o re lo se lanzu cu zvati lo zdani •i ju'o no da djica lo nu kansa no da lo nu zvati •i ji'a na sai cumki fa lo nu curmi lo nu no da zvati lo zdani •i ca lo ba'e pa moi djedi lo selfu nixli noi na mulno klina ri'i la .gregor. fa lo du'u ke'a djuno ma kau lo pu fasnu cu cidni cpana pikci lo mamta lo nu zi co'u se jibri •i ba zi lo cacra be li fi'u vo lo selfu nixli cu cliva fau lo nu lo kanla cu klaku kei gi'e ckire fi lo nu co'u se jibri kei tai tu'a lo xamgu traji se zukte •i lo selfu nixli se cau lo nu da cpedu cu junri nupre lo du'u cusku no da su'o da

ni'o lo mensi jo'u lo mamta cu nau bilga lo nu jukpa •i ku'i la'e di'u na rinka lo mutce se gunka •i ki'u bo da ja'a ru'e citka •i la .gregor. cu so'i roi tirma lo nu da stidi lo nu citka kei lo drata •i ro roi spuda fi lu be'u nai ki'e li'u .a lo simsa •i ju'o cu'i ji'a pinxe no da •i lo mensi cu

preti cusku fi lo patfu fe lo se du'u xu kau djica lo nu pinxe lo birja •i my su'o roi xendo friti lo nu my klama te zu'e lo nu bevri by ti •i lo patfu cu stali lo ka smaji •i lo mensi cu jmina cusku te zu'e lo nu lo patfu na senpi kei lo se du'u zu'u nai my kakne lo nu minde lo vorme ninmu •i ro mai lo patfu cu spuda cusku lo vlipa me zo nai •i ja'e bo na za'o casnu lo cuntu

ni'o ca lo pa moi djedi lo patfu cu ciksi fi ge lo mamta gi ji'a lo mensi fe lo jdini tcini jo'u lo se kanpe •i py cu so'o roi cliva lo jubme gi'e lebna lo se papri .a lo notci cukta lo cmalu ke stela tanxe noi py ralte bandu ke'a lo nu lo jdini cuntu be py cu spofu pu za lo nanca be li mu •i gy tirna lo nu py gasnu lo nu kalri fa lo pluja stela gi'e xruti ganlo ba lo nu to'e setca lo se sisku •i lo ve ciksi be fo lo patfu cu pa moi lo pluka se tirna be la .gregor. co'a lo nu rinju •i la .gregor. pu krici lo du'u lo patfu cu ralte no da pe lo spofu cuntu •i zu'u lo patfu na pu cusku da •i je zu'u nai la .gregor. na pu te preti •i ca lo pu cabna la .gregor. cu se raktu lo nu zukte ro cumki lo nu lo lanzu cu zi to'e morji lo jdini betri noi rinka lo nu ro se lanzu cu jinru lo nu mulno to'e pacna •i gy co'a gunka se kai lo ka steci carmi •i gy ze'i lo nictē bi'i cerni cu farvi fi lo sampu se jibri fe lo litru vecnu noi li'a mutce drata kakne lo nu jerna lo jdini zi'e noi lo jibri se snada ta'i lo nu pleji cu zi binxo lo sligu jdini noi kakne lo nu se punji fi lo cpana be lo jubme bu'u lo zdani ca'u lo manci je gleki lanzu •i la'e di'u xamgu temci gi'e na rapli se kai do'a nai lo tai carmi •i ku'i la .gregor. cu jerna lo banzu

be lo nu sarji lo lanzu nu jdini pilno •i ge lo lanzu gi la .gregor. ba'o binxo lo se tcaci be la'e di'u •i da ckire fi lo nu te dunda lo jdini •i gy se pluka lo nu dunda •i ku'i la'e di'u xa'o na dirce lo steci glare •i lo po'o mensi cu za'o cinmo jorne la .gregor. •i gy mipri platu lo nu gasnu lo nu my ca lo balvi lamji nanca cu ve ckule fi lo zgike •i gy na jundi lo barda jdima noi ru'a lanxe se fapro ta'i da •i ki'u bo my noi frica la .gregor. lo ka no'a cu mutce lo ka prami lo zgike kei gi'e cinmo kelci lo jgita •i lo zgike ckule cu se casnu gy jo'u my so'i roi lo nu la .gregor. cu ze'i zvati lo tcadu •i ku'i go'i tai lo nu melbi se senva gi'e na'e ka'e se zunkte •i lo rirni na nelci lo nu tirna lo ji'a sai tai sampu kanpe se cusku •i ku'i la .gregor. cu jdice pensi la'e di'u gi'e platu lo nu junri gasnu lo nu djuno kei ca lo xriso jbena nictē

ni'o lo tai se pensi noi no da prali fi ke'a va'o lo cabna tcini be gy cu pagre lo stedu be gy ca lo nu gy stali lo lamji be lo vorme gi'e tirma •i gy ri'a lo nu tatpi cu su'o roi na za'o kakne lo nu tirna kei gi'e sevzi darxi lo stedu lo vorme •i ba zi bo ku'i gy xruti lafti lo stedu ki'u lo nu lo ji'a sai cmalu savru noi la'e di'u cupra cu re'o se tirna gi'e rinka lo nu ro da binxo lo smaji •i lu .a'u tu zunkte ma li'u cu ba zi se cusku lo patfu fa'a li'a lo vorme •i ba bo ca'o di'a ranji fa lo nu casnu poi pu se dicra

ni'o ta'i la'e di'u la .gregor. cu mulno facki to lo patfu cu ta'e so'i roi ciksi •i ki'u bo ge zu'u py mi'u ze'u pu na sazri lo tai cuntu gi zu'u nai lo mamta cu na jimpe ro da ca lo krefu be fi li pa toi lo du'u to'e ki'u

nai lo betri cu za'o stali fa lo cmalu se ricfu •i lo ve zivle noi pu ca'o na se pencu cu milxe zenba ze'a lo temci •i ji'a lo jdini poi la .gregor. ke'a pu bevri ca ro masti lo zdani to gy ralte lo rupnu be li so'u po'o toi cu na mulno se xaksu gi'e ba'o binxo lo cmalu se zivle •i la .gregor. ti'a lo vorme cu zanru frumu fau lo nu gleki lo nu pensi lo balvi gi'e ralte poi gy na pu se kanpe •i je'u la .gregor. cu pu ka'e pilno lo ve vimcu jdini lo nu ca'o pleji lo se dejni be lo patfu bei lo ralju •i je lo detri be lo nu uo kakne lo nu cliva lo jibri cu da'i zenba lo ka jibni •i ku'i ju'o nau zmadu fi lo ka xamgu kei fa lo nu lo patfu cu pu ganzu ta'i la'e di'u

ni'o ku'i lo jdini cu na mulno banzu lo nu lo lanzu cu jmive fi'o sabji lo ve zivle •i ju'o cu'i banzu lo nu sarji lo lanzu ze'a lo nanca be li pa ji'i re do'a •i tu'a li za'u na cumki •i ja'o .ei lo jdini cu na se pencu gi'e se ralte te zu'e lo te nitcu •i .ei lo jmive jdini cu se jerna •i lo patfu cu kanro nanmu gi'e ku'i xa'o to'e citno gi'e na'e gunka ze'a lo nanca be li mu gi'e na mutce lacri py mi'u lo nu tsali •i py ca'o lo nanca be li mu be'o noi zifre temci pa moi lo py troci jo'u ku'i na'e ferti nu jmive cu mutce zenba lo ka plana kei gi'e ja'e bo binxo lo mutce juxre •i mo fa lo to'e citno mamta •i xu my nau bilga lo nu jerna lo jdini •i my bilma lo nu vasxu se nandu •i lo nu my litru lo zdani cu rinka lo nu my tatpi •i my stali ze'a pa lo re djedi lo ka vreta lo sofa fau lo nu lo canko cu kalri ki'u lo nu se nandu lo nu vasxu •i xu lo ji'a mensi cu bilga lo nu jerna lo jdini •i my za'o verba li pa ze •i da gleki lo nu kakne lo nu sabji my lo jmive tadji poi my lifri co'u lo cabna zi'e noi

nu melbi dasni gi'e sipna mutce gi'e zdani sidju gi'e pagbu su'o cumla se zdile gi'e ra'u kelci lo jgita •i la .gregor. ca lo nu da casnu lo se nitcu poi nu jerna lo jdini cu cliva lo vorme gi'e renro gy lo lenku skapi sofa noi lamji lo vorme •i mu'i bo gy carmi xunre binxo ri'a lo nu ckeji gi'e badri

ni'o so'i roi ku gy ca'o vreta ze'a pi ro lo nicta gi'e na sai sipna gi'e mosra gy lo sofa skapi ze'a lo cacra be li so'o •i ja gy na randa lo troci nandu poi nu catke lo stizu fe'e co'u lo canko •i ba bo gy cpare lo canko kajna gi'e catlu fau lo nu cpana lo stizu gi'e se sarji lo canko kei pa'o ri gi'e morji lo nu gy tai ma kau cinmo lo ka zifre kei ca ro nu gy ti pu zvati •i gy ca'o lo temci cu jdika lo ka klina viska lo ji'a sai na'e mutce darno •i gy xa'o na kakne lo nu viska lo ragve spita noi lo nu stodi viska ke'a cu pu se dapma gy •i gy va'o lo nu da'i na prane djuno lo du'u gy xabju re'o la .carlotynctras. noi smaji je ku'i midju be lo tcadu be'o klaji cu ka'e jinvi lo du'u gy viska to'o lo canko lo kunti tumla noi lo grusi tsani jo'u lo grusi dertu cu jmaji ke'a se cau lo ka frica simxu •i lo po'o re krefu be lo nu lo jundi mensi cu viska lo nu lo stizu cu cnita lo canko cu banzu lo nu my co'a la'e di'u ba lo nu ganzu lo kumfa cu ro roi punji lo stizu lo cnita be lo canko gi'e ji'a sai gasnu lo nu lo nenri canko cu stali lo ka kalri

ni'o la .gregor. va'o lo nu da'i kakne lo nu tavla lo mensi gi'e ckire my lo se zunkte poi my bilga ke'a se va'u gy cu da'i frili zmadu sarji lo nu my selfu gy •i ku'i da'i nai gy dunku la'e di'u •i je'u lo mensi cu

troci lo nu pluka zenba fa lo to'e pluka tcini •i li'a my zenba lo ka frili snada kei fi'o se fancu lo temci •i ku'i ji'a la .gregor. cu zenba lo ka satci pajni lo tcini •i lo nu ji'a sai lo mensi cu klama lo nenri cu betri gy •i ta'e ku my klama lo nenri gi'e zi sirji bajra fa'a lo canko se cau lo nu denpa lo nu gasnu lo nu ganlo fa lo vorme •i la'e di'u na se fanta lo nu lo mensi cu ro roi jundi lo nu bandu ro da lo jvinu be lo kumfa pe la .gregor. •i my se pi'o lo sutra xance cu gasnu lo nu mulno kalri fa lo canko kei tai lo nu my na kakne lo nu vasxu •i my va'o lo ji'a sai nu mutce lenku cu ze'a stali lo crane be lo canko gi'e condi vasxu •i lo savru je nu bajra cu se jenca la .gregor. re roi ro djedi •i gy ze'a pi ro lo temci cu desku ni'a lo sofa •i gy prane djuno lo du'u da'i my pluka bandu gy ro la'e di'u va'o lo nu da'i my renvi lo nu stali lo kumfa pe la .gregor. fau lo nu lo canko cu ganlo

ni'o lo mensi ca lo krefu za lo masti be li ji'i pa ba lo nu la .gregor. cu binxo to no da steci krinu lo nu lo jvinu be gy cu xa'o se manci my toi cu to'e cliva pu lo se kanpe tcika gi'e facki lo du'u la .gregor. cu catlu pa'o lo canko gi'e cando gi'e je'u se terpa •i la .gregor. na'e se spaji lo nu my na klama lo nenri kei ki'u lo nu gy zunti lo nu my kakne lo nu zi gasnu lo nu kalri fa lo canko •i ku'i my ge po'o nai na klama lo nenri gi ji'a xruti gi'e gasnu lo nu ganlo fa lo vorme •i da'i lo fange cu ka'e jinvi lo du'u la .gregor. pu troci lo nu gunta gi'e batci my •i li'a la .gregor. cu zi mipri gy fo lo cnita be lo sofa •i ku'i gy bilga lo nu denpa co'u lo donri midju lo nu lo mensi cu xruti •i my simlu lo ka

mutce zmadu lo cnano lo ka dunku •i la .gregor. cu sanji ge lo nu lo jvinu be gy cu za'o je ba ca'o na'e se renvi my gi lo nu my nitcu lo nu my sevzi jitro kei lo nu na bajra cliva ca lo nu viska lo ji'a sai cmalu pagbu be lo gy xadni be'o poi preja lo bartu lo cnita be lo sofa •i gy te zu'e lo nu bandu my lo ji'a tai jvinu cu bevri lo ckana boxfo fau lo nu ri cpana lo trixe be gy kei lo cpana be lo sofa to gy nitcu lo cacra be li vo lo nu no'a toi gi'e punji lo boxfo ja'e lo nu ge gy mulno se gacri gi lo mensi na kakne fau lo ji'a sai nu korcu kei lo nu viska gy •i lo mensi va'o lo nu da'i jinvi lo du'u lo boxfo na se nitcu cu zifre lo nu vimcu •i ki'u bo li'a la .gregor. na te mukti lo nu gy sepli kei lo pluka •i ku'i my curmi lo nu lo boxfo cu stali •i ji'a la .gregor. cu smadi ganse lo nu my ckire catlu kei ca lo nu gy milxe je kurji lafti lo stedu te zu'e lo nu viska lo nu tai ma kau lo mensi cu frati lo cnino te ganzu

ni'o ze'a lo pa moi djedi be li pa vo lo rirni cu na snada lo nu jdice lo nu klama lo nenri be lo kumfa •i la .gregor. cu so'i roi tirna lo nu ra nau zanru lo se gunka be lo mensi to'e ki'u nai lo nu ra pu fengu my lo nu my simlu lo ka juxre •i ge lo patfu gi lo mamta cu su'o roi denpa fi lo crane be lo kumfa pe la .gregor. ca lo nu lo mensi cu ganzu •i my ca lo nu ba'o cliva cu zi bilga lo nu skicu fo lo tcila fe lo nu ma kau jvinu lo kumfa kei jo'u lo nu la .gregor. pu citka ma kau kei jo'u lo nu gy pu tarti ma kau ca lo ca krefu kei jo'u lo nu xu kau ju'o cu'i ganse lo cmalu nu zenba lo ka kanro •i je'u lo mamta cu zi sa'e nai djica lo nu klama lo nenri te zu'e lo nu viska la .gregor. •i ku'i lo patfu jo'u lo mensi cu fanta •i go'i ca lo cfari se pi'o lo racli se darlu noi la .gregor.

cu mutce jundi tirna ke'a gi'e mutce tugni fi ke'a •i ba bo bapli fanta •i lo mamta cu krixu lu ko curmi lo nu mi klama lo nenri gi'e viska la .gregor. uu noi bersa mi •i xu do na jimpe lo du'u .ei mi klama lo nenri gi'e viska gy li'u •i la .gregor. ca lo nu go'i cu jinvi lo du'u ju'o cu'i xamgu fa lo nu lo mamta cu ja'a klama lo nenri •i li'a .ei na co'e ca ro djedi •i ku'i ja'a co'e pa roi ro jeftu •i my mutce zmadu lo mensi lo ka drani jimpe ro da •i lo mensi to'e ki'u nai lo nu virnu cu verba po'o gi'e la'a binxo lo fuzme be lo tai nandu mu'i lo nu cifnu na'e pensi

ni'o lo se djica be la .gregor. be'o poi nu viska lo mamta cu ba zi binxo lo fatci •i gy na'e djica se va'u lo rirni lo nu gy jarco gy pa'o lo canko ca lo donri •i ku'i ji'a gy na kakne lo nu mutce cpare lo loldi noi kurfa mitre be li so'u •i gy nandu renvi lo nu cando vreta ze'a lo nicta •i lo ji'a sai cidja cu zi na se gleki gy •i gy te zu'e lo nu se zdile cu co'a se tcica lo nu cpare fi ro da fe lo bitmu jo'u lo drudi •i gy steci nelci lo nu stali lo ka dandu lo drudi •i la'e di'u mutce frica lo nu vreta lo loldi •i zmadu fi lo ka zifre vasxu •i lo xadni cu milxe slilu •i ca lo nu gy jinru lo nu ga'u na'e ru'e gleki se zdile cu cumki fa lo nu ue farlu gi'e janli lo loldi •i ku'i li'a gy nau jitra lo xadni be gy tai lo mutce frica be lo purci •i je na'e xrani gy fa lo ji'a sai tai nu farlu •i lo mensi cu zi sanji lo cnino zdile poi la .gregor. cu facki •i gy ca lo nu cpare cu cliva ti'a gy lo snipa marji sinxa •i my jdice lo nu dunda fi la .gregor. fe lo barda canlu poi gy kakne lo nu cpare ke'a •i .ai my lebna lo nilce poi fanta la'e di'u zi'e no'u ra'u lo se dacru jo'u lo ciska jubme •i my na

kakne lo nu kansa no da la'e di'u kei gi'e ji'a na darsi lo nu cpedu lo nu lo patfu cu sidju •i ju'o lo selfu nixli na'e sidju ki'u lo nu ny noi nanca li ji'i pa xa cu virnu ia renvi co'a lo nu lo pu jukpa cu cliva kei gi'e ku'i cpedu lo nu zifre lo nu gasnu lo nu ru'i ganlo fa lo jukpa kumfa gi'e co'a kalri va'o lo po'o steci sinxa •i ja'o lo mensi cu kakne no na'e bo lo nu se sidju lo mamta ca lo nu lo patfu na zvati •i lo mamta fau lo nu fenki gleki krixu cu binxo lo jibni gi'e ku'i co'a smaji ca'u lo vorme be lo kumfa pe la .gregor. •i lo mensi cu binxo lo birti be lo du'u ro lo nenri be lo kumfa cu te ganzu •i ba bo my curmi lo nu lo mamta cu klama lo nenri •i la .gregor. cu pu sutra lo nu punji lo boxfo lo dizlo zmadu gi'e polje ra so'i da ja'e lo nu je'u simlu lo ka ba'o cunso se renro fi lo sofa •i la .gregor. cu rivbi ca lo ca krefu lo nu mipri catlu to'o lo cnita be lo boxfo •i gy bredi lo nu na viska ca lo ca krefu lo mamta kei gi'e se mansa lo nu my klama •i lu .e'e ko ti klama •i na se viska li'u se cusku lo mensi noi na'e senpi ke xance gidva lo mamta •i la .gregor. cu tirna lo nu ta'i ma kau lo re ruble ninmu cu gasnu lo nu muvdu fa lo tilju je to'e citno se dacru fi lo stuzi be ri •i lo mensi cu zunkte lo barda traji pagbu be lo se gunka se cau lo nu tirna lo te kajde be fi lo mamta noi terpa lo nu lo mensi cu dukse lo ka nandu troci •i lo se gunka cu clani temci •i lo mamta ba lo nu gunka ze'a lo caca be li ji'i fi'u vo cu xusra lo du'u .ei da curmi lo nu stali fa lo se dacru ti •i ki'u bo pa mai ta dukse lo ka tilju kei gi'e na ba mo'u se muvdu pu lo nu lo patfu cu xruti •i bo re mai na mulno birti lo du'u lo nu vimcu lo nilce cu xamgu la .gregor. •i lo mamta cu jinvi lo

fapro •i lo jvinu be lo lunbe bitmu cu danre lo risna be my •i ki'u ma la .gregor. na ba mintu cinmo •i gy ze'u se tcaci tu'a lo nilce be lo kumfa gi'e ja'o ru'a ba cinmo bu'u lo kunti kumfa lo ka se cliva

ni'o lu •i xu na ku li'u cu to'e cladu se cusku lo mamta noi ro roi to'e cladu bacru tai lo nu djica lo nu rivbi lo nu la .gregor. noi my na se slabu lo satci ke mipri diklo cu tirna lo ji'a sai sance be lo voksa be my •i my traji krici lo du'u gy na jimpe lo vals •i lu xu na ku lo nu vimcu lo nilce cu simlu lo ka jarco lo nu co'u pacna lo nu gy ba zenba lo ka kanro •i xu na simlu lo ka curmi lo nu gy stali lo dimna be gy se cau lo nu kurji •i pe'i xamgu zmadu fa lo nu troci lo nu lo kumfa cu stali lo pu tcini be ri kei te zu'e lo nu la .gregor. ca lo nu xruti ma'a cu to'e cirko ro da lo pu tcini gi'e frili zmadu kakne lo nu to'e morji lo ca temci li'u

ni'o la .gregor. ca lo nu tirna lo vals pe lo mamta cu sanji lo nu ju'o ge lo nu remna kansa claxu gi lo nu stodi manfo xabju lo lanzu zdani cu rinka lo nu ca'o lo masti be li re lo nu gy menli stati cu binxo lo kalsa •i no drata cu ka'e ve ciksi lo nu gy pu junri djica lo nu lo kumfa cu binxo lo kunti •i xu je'u gy djica lo nu curmi lo nu da galfi lo glare kumfa noi kufra se nilce lo se cerda be fi lo lanzu ku'o lo kevna poi •i'a zu'u gy kakne lo nu cpare ke'a ro da se cau lo zunti zi'e poi ku'i zu'u nai bu'u ke'a gy zi mulno to'e morji lo gy remna purci •i gy pu'o zi to'e morji •i lo po'o voksa be lo mamta be'o noi gy ze'u pu na tirna cu rinka lo nu gy cikna •i .ei no da se vimcu •i .ei ro da stali •i gy

nitcu fau lo nu se tcini lo cabna kei lo xamgu ve xlura be fo lo nilce .i va'o lo nu lo nilce cu fanta lo nu gy fenki cpare fi lo cunso cu na to'e prali gi'e ja'a ja'e prali .i ku'i .u'u lo mensi cu na tugni .i my se cau nai lo nu jerna cu ba'o binxo lo simlu be lo ka certu be ro cuntu poi srana la .gregor. bei lo rirni .i lo se stidi be lo mamta cu banzu mukti fi lo mensi fe lo nu vimcu ge po'o nai lo se dacru jo'u lo ciska jubme vu'o noi my platu ca lo cfari gi ji'a ro nilce poi na me lo sofa noi traji se nitcu .i li'a lo nu cifnu xarnu jo'u lo nu sevzi lacri poi na'e se kanpe je nandu jerna cu na se steci lo ka catke my fa'a lo nu cpedu minde la'e di'u .i je'u my zgana lo nu la .gregor. cu nitcu lo barda canlu lo nu cpare .i zu'u nai za'a do'a nai lo nilce na ca'o se pilno

ni'o ku'i ju'o cu'i vajni fa lo ji'a fadni ke cinmo carmi se tarti be lo citno nixli .i la .greten. cu se xlura fi lo nu curmi lo nu lo tcini be la .gregor. cu zenba lo ka se terpa .i ta'i la'e di'u la .greten. cu ba kakne lo nu zunkte se va'u la .gregor. lo zmadu be lo ca se zunkte .i no na'e bo la .greten. cu ba darsi lo nu klama lo nenri be lo kumfa poi la .gregor. po'o cu jitro lo kunti bitmu .i ja'o la .greten. na curmi lo nu lo se jdice be gy cu cenba gau lo mamta noi ki'u lo nu dunku cu simlu lo ka na'e snura cinmo ne'i lo vi kumfa .i lo mamta cu zi binxo lo smaji gi'e sidju lo mensi se kai lo ka tsali mulno kei lo nu lebna lo se dacru .i .i'a la .gregor. va'o lo sarcu cu kakne lo nu claxu lo se dacru .i ku'i .ei lo ciska jubme cu stali .i la .gregor. ba lo nu lo ninmu cu cliva lo kumfa fi'o kansa lo se dacru noi sarji ny fau lo nu ny cmoni cu zi to'e setca lo

stedu lo cnita be lo sofa te zu'e lo nu jdice lo du'u ta'i ma kau gy kakne lo nu zukte pagbu lo cuntu se kai lo ka prije je racli traji cumki •i ku'i .u'u lo mamta cu pa moi lo xruti ca lo nu la .greten. bu'u lo lamji kumfa cu jgari lo se dacru lo birka lo sruri gi'e kansa be no da catke fa'a je to'o gi'e li'a na snada lo nu ve'i ji'a sai gau muvdu fa ra •i ku'i lo mamta cu na se tcaci lo nu viska la .gregor. •i my ka'e binxo lo bilma fi'o fuzme gy •i ja'o la .gregor. cu xruti cpare gi'e terpa binxo lo darno fa'a lo drata fanmo be lo sofa •i ku'i gy na kakne lo nu rivbi lo nu lo boxfo cu milxe to'e cando bu'u lo crane •i la'e di'u banzu lo nu rinka lo nu lo mamta cu jundi •i my sisti gi'e ze'i stali lo ka smaji •i ba bo my xruti lo ka kansa la .greten.

ni'o la .gregor. cu rapli cusku fi gy fe lo se du'u ge no na'e fadni cu fasnu gi po'o so'o nilce cu gau cenba lo ka zvati •i ku'i gy ba zi randa jinvi lo du'u lo nu lo ninmu cu so'i roi klama da de gi'e ze'i krixax gi'e gasnu lo nu sakli fa lo nilce lo loldi cu rinka lo nu gy ganse lo barda kalsa noi banro to'o ro da •i gy gasnu lo nu to'e preja fa lo stedu jo'u lo tuple •i ku'i gy traji bilga lo nu randa jinvi lo du'u gy na ba renvi la'e di'u lo clani •i ny ca'o gasnu lo nu lo kumfa cu binxo lo kunti •i ny lebna ro lo dirba be gy •i lo se dacru noi ne'i ke'a gy ralte lo katna jo'u lo drata tutci cu xa'o se vimcu •i ny nau ca'o gasnu lo nu binxo lo kluza fa lo ciska jubme noi ba'o se lasna fi lo loldi zi'e noi bu'u ke'a gy zukte lo se bilga ca lo nu tadni lo vecnu larcu kei jo'u lo nu ve ckule fo lo re moi kei jo'u ji'a sai lo nu ve ckule fo lo pa moi •i na banzu fa lo

temci lo nu gy cipra fi lo re ninmu fe lo ka xu kau zunkte fi lo nu xendo
•i je'u gy na'e ru'e to'e morji lo nu ny zasti •i ki'u bo ny ri'a lo nu tatpi
cu smaji gunka •i gy tirna lo po'o nu to'e kinli stapa fi lo jamfu

ni'o ja'o gy suksa klama lo bartu •i lo ninmu cu ca zvati lo lamji
kumfa gi'e se sarji lo ciska jubme te zu'e lo nu xruti lo nu cnano vasxu
•i gy cu vo roi stika lo farna be lo nu muvdu •i gy na birti lo du'u .ei
gasnu lo nu snura fa ma kau •i gy viska fi lo kunti bitmu fe lo pixra be
lo ninmu poi se taxfu lo skapi •i gy sutra cpare fi lo galtu gi'e co'a tagji
lo pixra noi lo blaci pe ke'a cu se rinju gy gi'e gasnu lo nu gy jdika lo
ka jelca cortu lo betfu •i lo do'a nai vi pixra noi la .gregor. cu mulno
gacri cu ba se lebna no da •i gy gasnu lo nu lo stedu cu se farna lo
vorme be lo ralju kumfa te zu'e lo nu zgana lo ninmu ca lo nu ny xruti

ni'o ny na curmi lo nu ny ze'u denpa gi'e zi xruti •i la .greten. cu
jgari lo mamta lo birka lo sruri gi'e na ru'e bevri my •i lu .ei mi'o nau
lebna ma li'u se cusku la .greten. fau lo nu catlu lo sruri •i ca bo lo nu
gy catlu cu kruca lo nu catlu fa la .gregor. noi zvati lo bitmu •i ju'o lo
po'o nu lo mamta cu zvati cu rinka lo nu la .greten. cu stali lo ka surla
•i gy gasnu lo nu salpo fa lo flira fa'a lo mamta kei te zu'e lo nu fanta
lo nu my catlu lo sruri •i gy desku je se jenca cusku lu .e'u mi'o xruti
lo ralju kumfa li'u •i la .gregor. cu klina jimpe lo te zunkte be fi la
.greten. •i ri djica lo nu bevri lo mamta lo snura diklo gi'e ba bo gasnu
lo nu la .gregor. cu cliva lo bitmu •i .e'e troci •i la .gregor. cu platu lo

nu stali lo ka cpana lo pixra kei gi'e na randa •i gy breidi lo nu plipe lo flira be la .greten.

ni'o ku'i lo mi'u valsi pe la .greten. cu rinka lo nu xanka fa lo mamta noi muvdu lo mlana gi'e viska lo barda je bunre barna lo xrula pixra pelji •i my pu lo nu sanji lo nu tu poi my viska ke'a cu me la .gregor. cu krixa se pi'o lo rufsu je cladu voksa lu doi cevni doi cevni li'u gi'e farlu lo sofa •i lo birka be my cu preja tai lo nu my randa cliva ro da •i je my stali lo ka cando •i lu .o'i le'o doi .gregor. li'u cu se krixa lo mensi fau lo nu lafti lo ganlo xance gi'e setca catlu •i di'u co'a lo nu binxo cu pa moi lo valsi poi my sirji cusku ke'a gy •i my bajra fa'a lo lamji kumfa te zu'e lo nu sisku lo jikru poi my kakne lo nu pilno ke'a lo nu gasnu lo nu binxo lo cikna fa lo mamta noi na'e sanji •i la .gregor. ji'a cu djica lo nu sidju to lo temci cu ba banzu lo nu gasnu lo nu snura fa lo pixra toi •i ku'i gy snipa lo blaci gi'e bilga lo nu tsali gasnu lo nu na'e jorne •i ba bo gy ji'a bajra fa'a lo lamji kumfa tai lo nu kakne lo nu stidi da lo mensi tai lo nu pu zu co'e •i ku'i gy bilga lo nu stali lo ka trixe my gi'e zunkte no da •i la .greten. ca lo nu xruti carna fau lo nu se sruri lo vrici botpi cu se jenca •i pa lo botpi cu farlu lo loldi gi'e porpi •i lo blaci spisa cu xrani la .gregor. lo flira •i lo slami litki cu flecu fi gy •i la .greten. se cau lo nu denpa cu jgari ro botpi poi gy kakne lo nu bevri ke'a •i je gy bajra fa'a lo se zvati be lo mamta •i gy gasnu lo nu ganlo fa lo vorme kei se pi'o lo jumfa •i la .gregor. cu nau sepli lo mamta noi ju'o cu'i pu'o binxo lo morsi fi'o

fuzme gy •i .ei gy na gasnu lo nu kalri fa lo kumfa •i gy na djica lo nu gasnu lo nu cliva fa lo mensi noi .ei stali lo ka kansa lo mamta •i .ei gy nau denpa po'o •i gy dunku lo se zungi jo'u lo raktu gi'e co'a cpare gi'e cpare ro da no'u lo bitmu jo'u lo nilce jo'u lo drudi •i ro mai gy fau lo nu to'e pacna kei ca lo nu lo kumfa co'a mluni gy cu farlu lo midju be lo barda jubme

ni'o la .gregor. cu ba zi mutce tatpi vreta •i ro da cando ru'u gy •i ju'o cu'i la'e di'u xamgu sinxa •i lo janbe cu se sance •i li'a lo selfu nixli cu nenri lo jukpa kumfa •i la .greten. cu bilga lo nu gasnu lo nu kalri •i lo patfu cu to'e cliva •i lu ma pu fasnu li'u cu pa moi lo py valsi •i lo jvinu be la .greten. cu to'e mipri ro da •i la .greten. cu spuda cusku se pi'o lo se zunti voksa to ju'o lo flira be gy cu tagji lo cutne be lo patfu toi lu lo mamta cu binxo lo na'e sanji •i ku'i nau xamgu zmadu •i la .gregor. cu binxo lo na'e rinju li'u •i lu mi pu kanpe sei lo patfu cu cusku •i mi pu so'i roi cusku •i ku'i do doi ninmu no roi jundi li'u

ni'o la .gregor. cu co'a sanji lo nu lo patfu cu srera jimpe lo pindi datni pe la .greten. gi'e sruma lo du'u la .gregor. pu zunkte lo vlile •i ja'e bo .ei gy troci lo nu gasnu lo nu surla fa lo patfu •i gy te zu'e lo nu ciksi cu ponse ge nai lo temci gi nai lo nu kakne •i gy sutra bajra fa'a lo vorme be lo gy kumfa gi'e binxo lo tagji be ra te zu'e lo nu lo patfu co'a lo nu klama lo nenri be lo rinsa kumfa cu viska ge lo nu la .gregor. cu zabna platu lo nu zi xruti lo gy kumfa gi lo nu na sarcu fa

lo nu bapli lo nu gy xruti klama •i lo nu gasnu lo nu kalri fa lo vorme
cu banzu lo nu gy zi canci

ni'o ku'i lo patfu na se tcini lo nu ka'e sanji lo tai ralci tcila •i zo .a'a
cu se krixax py ca lo nu klama lo nenri kei se pi'o lo tonga poi jarco lo
nu py fengu je ca bo gleki •i la .gregor. cu to'e punji lo stedu lo vorme
gi'e lafti ra fa'a lo patfu •i gy na pu kanpe lo nu zgana lo nu lo patfu
cu simlu ma kau •i je'u gy ze'a pu jundi lo po'o nu cpare ro da kei gi'e
sisti lo nu se cinri tai tu'a lo purci lo cuntu poi fasnu bu'u lo drata
pagbu be lo zdani •i je'u .ei gy bredi lo nu facki lo du'u lo tcini cu ba'o
cenba •i ku'i ia nai xu tu za'o me lo patfu •i xu me lo mi'u nanmu poi
ta'e jinru vreta lo ckana ca lo nu la .gregor. cu vecnu litru •i xu me lo
mi'u nanmu poi ca lo vanci poi ca ke'a gy xruti cu rinsa gy fau lo nu
dasni lo ckana pastu gi'e zutse lo barda stizu gi'e na kakne lo nu binxo
lo sanli kei gi'e po'o lafti lo birka fa'a gy fi'o se sinxa lo nu gleki •i xu
me lo mi'u nanmu poi ca'o lo rirci ke kampu nu litru ca ga lo re soldei
pe lo nanca gi lo traji vajni ke salci detri cu cadzu bu'u la .gregor. bi'i
lo mamta vu'o noi masno cadzu ku'o se kai lo ka masno zmadu ji'a sai
kei fau lo nu se gacri lo to'e citno kosta gi'e ro roi kurji punji lo cadzu
grana zi'e poi ca lo nu djica lo nu cusku da cu so'a roi sanli stali gi'e
gasnu lo nu lo kansa cu jmaji lo sruri be ke'a

ni'o ku'i lo patfu cu nau mutce sirji sanli gi'e dasni lo tinsa je blanu
je se batke ke manfo taxfu noi simsa lo se dasni be lo banxa ke se
minde prenu •i ga'u lo galtu je tinsa karli pe lo kosta cu balni fa lo

jdari ke cnebo pilka •i ni'a lo culno mebri cu pagre fa lo nu cikna je jundi catlu fa lo xekri kanla •i lo blabi kerfa noi pu kalsa cu nau cnici lo ka komcu ke sirji se ganzu fi lo carmi je satci •i py bargu renro lo mapku noi bu'u ke'a cu ba'o jivbu lo solji skari sinxa be la'a lo banxa ku'o lo cpana be lo sofa pa'o lo kumfa •i py klama la .gregor. fau lo nu se fanza se flira •i lo jipno be lo kosta cu trixe •i lo xance cu nenri lo daski be lo palku

ni'o la'a py ji'a sai na djuno lo du'u py ba zunkte ma kau •i ku'i py lafti lo jamfu fe'e co'u lo na'e fadni galtu •i la .gregor. cu manci lo nu tai mutce barda fa lo cutci cnita •i ku'i la .gregor. cu na stali lo ka cando •i gy co'a lo pa moi djedi pe lo cnino nu jmive cu djuno lo du'u lo patfu cu jinvi fi gy fe lo du'u mapti fa lo po'o traji jursa •i gy bajra ca'u lo patfu •i gy sisti ca lo nu py sisti •i gy di'a sutra muvdu ca lo nu py muvdu •i tai so'i roi litru lo kumfa se cau lo nu da se jdice fasnu •i la'e di'u na simlu lo ka nu jersi •i ki'u bo masno litru •i la .gregor. cu stali lo loldi mu'i lo nu gy terpa lo nu lo patfu cu jinvi lo du'u steci palci fa lo nu gy cpare lo bitmu .a lo drudi •i zu'u nai la .gregor. bilga lo nu randa jinvi lo du'u gy na ba renvi fi lo mutce fe lo nu bajra •i ki'u bo gy ca lo nu lo patfu cu pa roi stapa cu bilga lo nu gasnu lo ci'i nu muvdu

ni'o gy co'a nandu vasxu •i je'u gy pu ji'a na se fepri lo se lacri •i gy ca lo nu slilu te zu'e lo nu bredi lo nu bajra cu ja'a ru'e ckaji lo ka lo kanla cu kalri •i gy fau lo nu se cfipu cu pensi no cumki poi drata lo

nu bajra •i gy na ru'e to'e morji lo nu gy ka'e pilno lo bitmu noi ku'i je'u se zunti lo nu ke'a se balni lo kojna je jipno culno •i ca bo lo ruble se renro cu farlu lo jibni be gy gi'e gunro lo crane be gy •i ra plise •i lo drata cu zi jersi •i la .gregor. cu cando ri'a lo nu terpa •i lo nu di'a bajra cu na'e te prali ki'u lo nu lo patfu ba'o jdice lo du'u renro gunta

ni'o lo patfu cu pu gasnu lo nu culno fa lo daski lo grute noi se krasi lo grute vasru poi cpana lo lamji jubme •i py renro lo plise ce'o lo plise se cau lo nu nau do'a nai satci farna troci •i lo cmalu je xunre plise cu gunro lo loldi tai lo nu se dikca kei gi'e simxu lo ka janli •i pa lo plise noi ruble se renro cu pencu lo trixe be la .gregor. gi'e ku'i sakli se cau lo nu xrani •i ku'i lo drata poi zi jersi cu binxo lo jinru be lo trixe be la .gregor. •i gy djica lo nu di'a binxo lo darno kei tai lo nu da'i lo nu gy cortu cu ba jdika ca lo nu gy cenba lo ka zvati ma kau •i ku'i gy simsa lo dinko se lasna gi'e mulno se cfipu preja •i gy ca lo nu ro re'u catlu cu snada lo nu viska lo nu lo vorme be lo gy kumfa cu binxo lo mulno kalri •i ca'u lo mensi noi krixu cu bajra cliva fa lo mamta noi dasni lo nenri skaci ki'u lo nu lo mensi cu pu gasnu lo nu na'e dasni fa lo mamta te zu'e lo nu sabji lo vacri ca lo nu za'o na'e sanji •i gy viska lo nu lo mamta cu bajra fa'a lo patfu gi'e ca'o ve'a cirko lo to'e se lasna ke nenri skaci gi'e jai se zunti tu'a ri gi'e farlu lo cpana be lo patfu gi'e jgari je tagji py to la .gregor. co'a fliba lo nu viska toi gi'e pikci py fau lo nu lo xance cu kruca simxu ti'a lo stedu kei lo nu py fraxu curmi lo nu la .gregor. cu jmive

ni'o ci mo'o

ni'o lo jursa ve xrani be la .gregor. noi renvi lo nu cortu ze'a lo masti be li za'u pa to lo plise cu stali lo ka jinru lo rectu kei tai tu'a lo se viska se morji ki'u lo nu no da darsi lo nu vimcu toi cu simlu lo ka rinka lo nu morji fa lo ji'a sai patfu lo du'u la .gregor. to'e ki'u nai lo ca badri jo'u rigni tarmi cu cmima lo lanzu gi'e .ei na lifri lo nu da tarti tai lo nu gy bradi •i lo lanzu cu bilga lo nu renvi lo rigni gi'e randa lo funca •i randa po'o •i zu'u la .gregor. ri'a lo ve xrani cu la'a mo'u cirko lo ka certu lo ka muvdu •i gy nitcu tai tu'a lo na'e kakne to'e citno lo clani mentu be li so'o lo nu pagre lo kumfa •i na'e ka'e pensi ji'a sai lo nu cpare lo galtu •i ku'i zu'u nai gy se cnemu fi lo xlali zenba tcini lo banzu se pleji •i ta'e ca lo vanci lo vorme be lo ralju kumfa noi gy co'a jundi zgana pu za lo cacra be li re cu gau binxo lo kalri •i ja'e bo gy fau lo nu vreta bu'u lo gy manku kumfa gi'e na se viska to'o lo ralju kumfa cu kakne lo nu viska lo lanzu lo se gusni jubme gi'e tirna lo nu ra casnu kei fau lo nu ro da curmi no'u va'i lo mulno frica be lo purci tadji

ni'o li'a lo ca nu casnu cu na simsa lo pu zu nu casnu poi la .gregor. bu'u lo xotli kumfa cu pu ta'e milxe badri pensi ke'a ca lo nu tatpi vreta lo cilmo milxe ckana •i lo temci cu so'e roi pagre fau lo nu smaji •i lo patfu cu zi binxo lo sipna bu'u lo stizu ba lo vanci sanmi •i lo mamta jo'u lo mensi cu simxu lo ka stidi lo nu smaji •i lo mamta noi salpo ni'a lo gusni cu fenso lo ralci taxfu se va'u lo dasni zarci •i lo

mensi noi pu co'a se jibri lo nu vecnu selfu cu tadni ca lo vanci lo tordu ciska tadji jo'u lo fraso bangu te zu'e lo nu ju'o cu'i ba za cpacu lo xamgu zmadu jibri .i lo patfu cu su'o roi binxo lo cikna .i je tai lo nu na djuno lo du'u pu zi sipna cu cusku fi lo mamta fe lu do mutce fenco ca lo ji'a ca djedi li'u gi'e zi xruti lo ka sipna kei ca lo nu lo mamta jo'u lo mensi cu simxu lo ka ce'u cisma fa'a ce'u

ni'o lo patfu mu'i lo klesi be lo nu xarnu cu jdari lo nu vimcu lo manfo taxfu ca lo nu zvati lo zdani .i lo ckana pastu cu na'e se pilno dandu lo genxu ca lo nu lo patfu cu milxe sipna bu'u lo stizu fau lo nu mulno dasni tai lo nu ge ro roi bredi lo nu selfu gi kanpe bu'u lo ji'a sai zdani tu'a lo voksa be lo ralju .i ja'e bo lo manfo taxfu noi ca lo cfari cu xa'o na citno cu co'a binxo lo to'e jinsa to'e ri'a nai lo nu kurji fa lo mamta jo'u lo mensi .i cafne fa lo nu la .gregor. ze'a lo mulno vanci cu catlu lo carmi taxfu noi mulno se barna zi'e noi lo solji skari batke cu ro roi jinsa zi'e noi lo to'e citno nanmu cu dasni be ke'a sipna fau lo nu na'e kufra mutce gi'e ku'i surla

ni'o lo mamta ca lo nu lo junla cu jarco li pa no cu troci lo nu gasnu se pi'o lo na'e cladu voksa lo nu lo patfu cu cikna kei gi'e xlura py lo nu klama lo ckana .i ki'u bo lo cabna cu na me lo jetnu nu sipna poi lo patfu cu nitcu ki'u lo nu py co'a gunka ti'u li xa pe lo cerni .i ku'i py se kai lo ka xarnu poi se ckaji py co'a lo nu se minde cu na sisti lo nu stali ze'a lo zmadu lo ka zvati lo jubme to'e ki'u nai lo nu py ta'e binxo lo sipna .i lo nu nandu troci cu sarcu lo nu xlura py lo nu canja lo

stizu lo ckana •i py to'e mu'i nai lo nu lo mamta jo'u lo mensi cu na
sisti lo nu milxe pante ze'a lo cacra be li fi'u vo cu masno se desku lo
stedu gi'e ralte lo kanla lo ka ganlo kei gi'e na binxo lo sanli •i lo
mamta cu lacpu py lo birka fau lo nu cusku lo xendo valsi •i lo mensi
cu cliva lo se gunka te zu'e lo nu sidju lo mamta •i ku'i la'e di'u na se
jalge ri'i lo patfu •i py zenba lo ka condi jinru lo stizu •i py ca po'o lo
nu lo re ninmu cu jgari py lo cnita be lo janco cu gasnu lo nu kalri fa
lo kanla kei gi'e catlu lo mamta jo'u lo mensi gi'e ta'e cusku lu .oi ti nu
jmive •i .oi ti tadji lo nu surla ca lo mi ro moi djedi li'u •i py se sarji lo
re ninmu gi'e tilju binxo lo sanli tai lo nu py mi'u cu traji lo ka tilju kei
lo se bevri be py •i py curmi lo nu lo ninmu cu bevri py lo vorme noi
bu'u ke'a py zbasu lo sinxa be lo nu py na nitcu ny gi'e kansa no da lo
nu di'a klama •i ca bo lo mamta jo'u lo mensi cu sutra cliva lo te fenso
jo'u lo penbi te zu'e lo nu bajra fa'a lo patfu gi'e za'o sidju py

ni'o ma pe lo lanzu noi se xaksu lo nu gunka zi'e noi randa lo nu
tatpi cu ka'e ponse lo temci poi banzu lo nu kurji la .gregor. •i lo lanzu
jdini cu ca'o jdika •i lo selfu nixli cu co'u se jibri •i lo sidju ninmu noi
barda mutce gi'e bongu ricfu gi'e se kerfa lo blabi je kalsa cu co'a
klama ca lo cerni jo'u lo vanci gi'e gunka lo tilju traji •i lo drata noi se
jmima fi lo nu mutce fenso cu se gunka lo mamta •i ji'a sai lo so'o
lanzu jemna noi lo mamta jo'u lo mensi cu pu gleki dasni ke'a ca lo nu
jikca jmaji jo'u lo nu salci zo'u bilga lo nu vecnu •i la .gregor. cu facki
la'e di'u ca lo vanci ra'i lo nu casnu lo jdima poi se cpacu •i ku'i lo traji

se pante cu nu na kakne lo nu cliva lo vi zdani noi dukse lo ka barda kei lo ca tcini •i mu'i bo na djuno lo du'u ta'i ma kau gasnu lo nu muvdu fa la .gregor. •i ku'i la .gregor. cu jimpe lo du'u lo nu jundi gy cu na se steci lo ka fanta lo nu muvdu •i ki'u bo da'i frili fa lo nu bevri gy se pi'o lo mapti tanxe poi se kevna lo re mei te zu'e tu'a lo vacri •i lo pa moi be lo nu fanta lo nu lo lanzu cu canja lo zdani cu nu mulno to'e pacna gi'e si'o lo lanzu cu ba'o se darxi fi lo betri poi dunli no da bu'u lo girzu be lo lanzu jo'u pendo ckini

ni'o ro se cpedu be lo munje bei lo pindi prenu cu mulno te mansa fi lo lanzu •i lo patfu cu bevri lo cerni sanmi lo to'e ralju se jibri be lo banxa •i lo mamta cu sevzi friti se va'u lo taxfu be lo fange prenu •i lo mensi noi se minde lo te vecnu cu fa'a je to'o bajra ti'a lo vecnu kajna •i ku'i lo ka tsali pe lo lanzu cu xa'o ba'o se xaksu •i lo trixe ve xrani cu za'u re'u co'a se cortu la .gregor. tai lo nu pu zi se lifri •i ca bo lo mamta jo'u lo mensi ba lo nu gasnu lo nu klama fa lo patfu lo ckana cu xruti gi'e mlana cliva lo se gunka gi'e binxo lo jibni simxu gi'e lamji simxu zutse •i ca bo lo mamta cu jarco fa'a lo kumfa pe la .gregor. gi'e cusku lu ko gasnu lo nu ganlo fa lo vorme doi .greten. li'u •i la .gregor. cu za'u re'u zvati lo manku •i ca bo lo re ninmu cu ne'i nai gasnu lo nu mixre lo ny se klaku kei gi'a po'o stodi catlu lo jubme se cau lo nu klaku

ni'o la .gregor. cu pagre lo nichte jo'u lo donri se cau nai ru'e lo nu sipna •i gy su'o roi pensi lo du'u gy ca lo balvi lamji krefu be lo nu lo

vorme cu binxo lo kalri cu fuzme zunkte lo cuntu be lo lanzu tai tu'a lo purci •i za'u re'u to'e canci lo gy menli ba zu lo mutce fa lo ralju jo'u lo krati jo'u lo vecnu se jibri jo'u lo vecnu cilre jo'u lo se minde nanla poi tordu lo ka gusni ku'o jo'u lo re ji'i ci drata kagni pendo jo'u lo nurma xotli selfu jo'u lo se prami je sutra se morji no'u lo te pleji ninmu pe lo mapku zarci zi'e noi gy prami xlura co junri je ku'i masno bo dukse •i ro da cu to'e canci co kansa lo prenu poi fange gi'a xa'o to'e se morji •i ku'i ro da se ba'i lo nu sidju gy .a lo gy lanzu cu bancu lo nu ka'e se pencu •i je la .gregor. ca lo nu da canci cu cinmo lo ka surla

ni'o ba la'e di'u gy na bredi lo nu se raktu lo lanzu •i po'o gy cinmo lo ka fengu lo nu mabla se kurji •i gy na kakne lo nu se xanri lo ka'e rinka be lo nu gy xagji •i ku'i gy platu lo nu ta'i ma kau to'e cliva lo sorcu kumfa gi'e lebna lo se djica to'e mu'i nai lo nu na sai xagji •i lo mensi se cau lo nu za'o pensi lo du'u ma kau ka'e kukte la .gregor. cu sutra catke punji ca lo cerni jo'u lo donri midju pu lo nu klama lo zarci kei se pi'o lo jamfu lo cunso cidja lo kumfa pe la .gregor. gi'e ba bo vimcu ca lo vanci se pi'o lo lumci burcu grana va'o lo nu lo cidja cu pu vrusi se zgana gi'a to cafne traji toi na pu se pencu •i lo nu ganzu lo kumfa cu se zunkte co sutra traji •i lo dasri be lo se to'e jinsa cu preja lo bitmu •i ro da se zvati lo pulce bolci jo'u lo se to'e jinsa •i la .gregor. ca lo cfari ca lo nu lo mensi cu to'e cliva cu punji gy lo to'e jinsa traji kojna te zu'e lo nu pante fi my ta'i lo nu tai zvati •i ku'i ju'o lo nu da'i gy tai stali ze'a lo jeftu be li so'i cu na rinka lo nu lo mensi cu zenba lo

ka xamgu tarti •i my ji'a viska lo se to'e jinsa gi'e ku'i jdice lo du'u na vimcu

ni'o lo mensi se kai lo ka cortu cinmo ganse noi te crino fi my zi'e noi su'a nau se ckaji ro lo se lanzu cu jundi lo nu .ei steci my po'o fa lo ka kurji lo kumfa pe la .gregor. •i ca da lo mamta cu gasnu lo nu lo kumfa pe la .gregor. cu lifri lo barda nu lumci noi my snada se pi'o lo djacu co klani be li so'o bei lo baktu to ku'i lo ji'a cilmo vanbi cu fanza la .gregor. noi preja je dunku je cando vreta lo sofa toi •i zi bo ku'i lo mamta cu se sfasa •i lo mensi ca lo nu sanji ca lo vanci lo se cenba be lo kumfa pe la .gregor. cu bajra fau lo nu cinmo condi cortu kei fa'a lo ralju kumfa gi'e porpi lo xamsi be lo se klaku to'e mu'i nai lo nu lo mamta cu galtu xance pikci •i lo rirni to lo patfu cu sukxa binxo lo cikna bu'u lo py stizu toi ca lo cfari cu manci zgana se cau lo nu kakne lo nu zukte da •i ba bo ry ji'a co'a cinmo •i lo patfu cu fa'a ri'u pante fi lo mamta fe lo nu na curmi lo nu lo mensi cu kurji lo nu lumci lo kumfa pe la .gregor. •i py fa'a zu'a krixax cusku fi lo mensi fe lo se du'una curmi lo nu za'u re'u lumci lo kumfa pe la .gregor. •i lo mamta cu troci lo nu bevri fi lo sipna kumfa fe lo patfu noi traji xanka •i ca bo lo mensi noi desku lo nu klaku cu darxi lo jubme lo cmalu ke ganlo xance •i ca bo la .gregor. cu siclu ri'a lo nu curve fengu fi lo nu no da te sidbo fi lo nu gasnu lo nu ganlo fa lo vorme kei te zu'e lo nu bandu gy lo tai jvinu jo'u lo tai savru

ni'o lo mensi noi mutce tatpi lo jibri be my cu xa'o na renvi lo nu kurji la .gregor. tai tu'a lo purci •i ku'i na sarcu fa ga lo nu lo mamta cu basti gi lo nu la .gregor. cu se cliva •i ki'u bo zvati fa lo sidju ninmu •i lo to'e citno ninmu noi lo speni pu binxo lo morsi zi'e noi ju'o lo tsali xadni cu sidju ke'a lo nu renvi lo xlali traji lo clani nu jmive cu na sai se rigni la .gregor. •i sy ny ca da se cau lo nu jetnu kucli cu cunso gasnu lo nu kalri fa lo vorme be lo gy kumfa •i je ca lo nu viska gy noi se spaji zi'e noi to'e mu'i nai lo nu no da jersi cu co'a bajra fa'a je to'o cu stali lo ka sanli gi'e manci fau lo nu lo birka cu kruca simxu •i sy ny co'a la'e di'u cu na cirko lo cumki poi nu gasnu lo nu milxe kalri fa lo vorme kei ca lo cerni jo'u lo vanci te zu'e lo nu catlu lo kumfa pe la .gregor. •i sy ny ca lo cfari cu trina gy fa'a sy ny lo valsi poi la'a sy ny jinvi lo du'u xendo zi'e no'u mu'a lu ko ti klama doi slabu ke kalci ke calku cinki li'u .a lu .u'e ko catlu lo slabu ke kalci ke calku cinki li'u •i la .gregor. cu spuda no da lo tai te trina •i gy cando stali lo se zvati be gy tai lo nu da'i lo vorme cu na kalri •i .au da minde lo sidju ninmu lo nu lumci ca ro djedi lo kumfa kei se ba'i lo nu curmi lo nu sy ny prali claxu fanza gy fi'o djica sy ny •i la .gregor. ca lo pa clira cerni to lo carmi carvi cu darxi lo canko blaci fi'o se sinxa ju'o cu'i lo zi vensa toi ca lo nu lo sidju ninmu cu za'u re'u co'a mabla cusku cu binxo lo tai fengu ja'e lo nu gy carna fa'a sy ny tai lo nu gunta sy ny •i ku'i gy masno je ruble •i lo sidju ninmu se ba'i lo nu binxo lo terpa cu sa'u lafti lo stizu poi zvati lo jibni be lo vorme •i sy ny stali fau lo nu lo moklu cu kalri •i li'a platu lo nu gasnu lo nu ganlo fa lo moklu ca lo

po'o nu lo stizu poi se jgari fi lo xance cu mo'u janli lo trixe be la .gregor. •i lu xu na ranji li'u cu preti fi sy ny ca lo nu viska lo nu la .gregor. cu xruti carna •i sy ny surla ke xruti punji lo stizu lo kojna •i la .gregor. cu nau citka ji'i no da •i gy va'o lo po'o nu cunso klama fo lo lamji be lo cidja cu lebna lo spisa te zu'e lo nu kelci sy ne'i lo moklu •i gy ralte sy lo nenri be my ze'u lo cacra be li so'o gi'e so'e roi sputu sy ca lo fanmo •i gy ca lo cfari cu jinvi lo du'u lo nu citka cu se fanta lo nu badri lo tcini be lo kumfa •i ku'i lo se cenba be lo kumfa cu zi se panpi gy •i binxo lo tcaci fa lo nu setca fi lo kumfa fe lo dacti poi na kakne lo nu punji ke'a lo drata se zvati •i nau so'i mei fa lo tai dacti ki'u lo nu pa lo kumfa be lo zdani cu zasni se vecnu fi lo ci vitke •i lo ci junri nanmu to la .gregor. cu zgana to'o lo vorme lo nu ro ci da cu flira se kerfa toi cu jundi lo te ganzu be ge po'o nai lo ra kumfa gi ji'a pi ro lo zdani •i steci jundi lo te ganzu be lo jukpa kumfa •i ra na renvi tu'a lo te pilno claxu dacti jo'u ra'u sai lo to'e jinsa •i ji'a ra ba'o bevri lo barda pagbu be lo ra nilce •i se ki'u bo dukse fa lo so'i dacti poi da na kakne lo nu vecnu ke'a zi'e poi na djica lo nu renro ke'a •i ro lo tai dacti cu gau muvdu lo kumfa pe la .gregor. •i go'i fa lo baktu be lo fagri festi be'o jo'u lo baktu be lo jukpa kumfa festi •i lo sidju ninmu noi ro roi sutra zunkte cu renro fi lo gy kumfa fe ro da poi claxu lo te pilno •i zabna funca fa lo nu la .gregor. cu so'e roi viska lo dacti jo'u lo po'o xance poi jgari ri •i ju'o cu'i lo sidju ninmu cu platu lo nu za'u re'u cpacu lo dacti ca lo nu ponse lo temci jo'u lo cumki •i ja ju'o cu'i platu lo nu pa roi renro ro da lo bartu •i ku'i je'u ro da stali lo se

zvati poi da farlu ke'a ca lo nu se renro ku'o gi'a muvdu ri'a lo nu la .gregor. cu muvdu fo lo jbini •i ca lo cfari gy tai zunkte bai lo nu no da kunti canlu poi curmi lo nu cpare •i ba bo ku'i gy zenba lo ka se pluka kei to'e mu'i nai lo nu gy ba lo tai nu litru cu morsi tatpi gi'e badri gi'e stali ze'a lo cacra be li so'o lo ka cando

ni'o lo vitke cu su'o roi citka lo vanci sanmi bu'u lo ralju kumfa •i se ki'u bo lo vorme cu stali ca su'o vanci lo ka ganlo •i ku'i la .gregor. cu pluka randa lo nu da na gasnu lo nu kalri •i ji'a sai gy ca su'o lo vanci poi ca ke'a lo vorme cu stali lo ka kalri cu na se prali fi la'e di'u gi'e vreta se cau lo nu lo lanzu cu zgana kei lo manku traji kojna be lo kumfa •i ku'i ca lo pa krefu lo sidju ninmu cu snuti curmi lo nu kalri fa lo vorme be lo ralju kumfa •i lo vorme cu stali lo ka kalri ca lo ji'a sai nu ge lo vitke cu to'e cliva gi gau cikna fa lo gusni •i ra zutse lo stuzi poi bu'u ke'a pu citka fa lo patfu jo'u lo mamta jo'u la .gregor. •i ra to'e polje lo boxfo gi'e jgari lo dakfu jo'u lo forca lo xance •i zi bo to'e canci pa'o lo vorme fa lo mamta noi bevri lo palne be lo rectu •i ba bo go'i fa lo mensi noi bevri lo palne be lo patlu •i lo cidja cu danmo dirce •i lo vitke cu salpo ga'u lo crane palne tai lo nu djica lo nu lanli pu lo nu citka •i je'u lo nanmu poi zutse lo midju zi'e noi simlu lo ka traji lo ka catni kei lo ci mei cu katna lo spisa be lo rectu bu'u lo palne te zu'e lo nu cipra lo ka ranti banzu gi'e na nitcu lo nu xruti se benji fi lo jukpa kumfa •i lo nu cipra cu mansa ra •i lo mamta

jo'u lo mensi vu'o noi pu zgana ro da fau lo nu xanka cu co'a cisma
gi'e condi vasxu

ni'o lo lanzu cu citka bu'u lo jukpa kumfa •i ku'i lo patfu pu lo nu
klama lo nenri be lo jukpa kumfa cu klama lo ralju kumfa gi'e pa roi
salpo rinsa fau lo nu jgari lo mapku lo xance kei gi'e litru lo sruri be lo
jubme •i lo vitke cu binxo lo sanli gi'e to'e cladu bacru da fa'a lo vy
creka karli •i vy ca lo nu xa'o kansa no da cu citka fau lo nu na ru'e
traji smaji •i la .gregor. cu se cizra lo vrici sance be lo nu citka •i lo nu
lo denci cu marxa cu so'i roi se tirna tai lo nu vy djica lo nu jarco fi
la .gregor. fe lo nu ge da nitcu lo denci lo nu citka gi lo ji'a sai melbi
traji xedja cu na xamgu basti lo denci •i lu ku'i mi na xagji sei la
.gregor. fi gy se raktu cusku •i ku'i mi djica lo tai cidja •i .oi lo vitke cu
citka •i je mi morsi binxo li'u

ni'o ca lo mi'u vanci cu sance lo jgita noi la .gregor. na morji lo nu
tirna ca lo temci •i lo vitke cu xa'o ba'o citka •i lo midju cu to'e setca lo
karni gi'e dunda lo papri ro lo re drata •i lo ci mei cu tcidu gi'e sigja
vasxu fau lo nu vreta zutse •i vy ca lo nu lo jgita cu co'a se sance cu
jundi tirna •i vy binxo lo sanli gi'e smaji klama lo vorme be lo rinsa
kumfa •i bu'u lo vorme lo vitke cu stali lo ka cando je sanli gi'e tagji
simxu •i ju'o da to'o lo jukpa kumfa cu tirna vy •i ki'u bo lo patfu cu
krixa lu xu fanza lo io nanmu fa lo zgike •i ka'e zi sisti lo nu kelci li'u
•i lu dukti sei lo midju nanmu cu cusku •i xu lo io citno ninmu cu
djica lo nu klama mi'a gi'e kelci bu'u lo vi kumfa noi mutce zmadu fi

lo ka kufra gi'e pluka li'u •i lu li'a go'i li'u cu krixax se cusku lo patfu tai lo nu py mi'u cu kelci lo jgita •i lo nanmu cu xruti lo kumfa gi'e denpa •i ba zi bo to'e cliva fa lo patfu noi bevri lo zbepi ku'o jo'u lo mamta noi bevri lo zgike papri ku'o jo'u lo mensi noi bevri lo jgita •i lo mensi cu surla gasnu lo nu bredi fa lo ro se nitcu be fi lo nu kelci •i lo rirni noi pu no roi zasni vecnu lo kumfa gi'e ja'e bo dukse lo ka clite ri'i lo vitke cu na darsi lo nu zutse lo stizu poi se ponse ry mi'u •i lo patfu cu se sarji lo vorme fau lo nu punji lo pritu xance lo jbini be lo re batke be lo se lasna kosta •i lo mamta cu te friti lo stizu pa lo nanmu •i my curmi lo nu lo stizu cu stali lo se zvati poi lo nanmu cu cunso punji ra ke'a •i se ki'u bo my stali lo ka zutse bu'u lo sepli kojna

ni'o lo mensi cu co'a kelci •i lo patfu jo'u lo mamta to'o lo se zvati cu jundi lo xance nu muvdu •i la .gregor. noi se trina lo zgike cu milxe klama lo crane •i lo stedu be gy cu xa'o zvati lo ralju kumfa •i gy ja'a ru'e se cizra lo nu ca lo zi temci cu na clite pensi lo drata •i gy ca lo purci cu jgira lo nu clite pensi •i .ei da'i la'e di'u mi'u cu nau mukti fi gy fe lo nu sevzi mipri •i ki'u bo gy mulno se gacri lo pulce ri'a lo nu lo pulce cu kuspe lo gy kumfa gi'e vofli fa'a ro da ri'a lo cmalu traji nu muvdu •i gy cpana be lo trixe jo'u mlana be'o bevri fi ro da fe lo cilta jo'u lo kerfa jo'u lo cidja festi •i gy dukse lo ka na'e kurji ro da kei lo nu gy gunro lo trixe gi'e lumci mosra gy lo loldi gacri tai lo nu gy pu zukte so'i roi ro djedi •i gy to'e mu'i nai lo tai tcini cu nau na ckeji lo nu muvdu lo crane fo lo jinsa traji loldi be lo ralju kumfa

ni'o zu'u nai no da jundi gy •i lo lanzu cu mulno se cokcu lo zgike be lo jgita •i si'a nai lo vitke noi ca lo cfari fau lo nu lo xance cu nenri lo daski cu dukse jibni lo trixe be lo zbepi pe lo mensi tai lo nu da'i kakne lo nu tcidu lo zgike papri zi'e noi ju'o ru'a tai fanza lo mensi cu zi klama fau lo nu ge xadba voksa tavla gi lo stedu cu salpo kei lo canko noi vy stali ke'a ca lo nu lo patfu cu se raktu zgana vy •i je'u vy mutce simlu lo ka na se mansa fi lo pu se sruma poi nu tirna lo melbi ja zdile zgike be lo jgita •i vy simlu lo ka tatpi lo se tigni gi'e curmi lo nu fanza vy kei mu'i lo po'o nu clite •i lo tadjji be lo nu dirce fa'a lo galtu lo sigja danmo pa'o lo moklu jo'u lo nazbi cu sinxa lo nu mutce xanka •i ku'i lo mensi cu tai certu kelci •i lo flira cu salpo fa'a lo mlana •i lo kanla cu jundi je badri jersi lo tonga lerfu •i la .gregor. cu litru lo milxe zmadu •i gy ralte lo stedu lo lamji be lo loldi te zu'e lo nu ju'o cu'i penmi simxu fa lo nu catlu •i .oi xu gy xa'o me lo danlu poi cinmo ri'a lo zgike •i simlu fi gy fe lo ka gy te jarco lo dargu be lo na'e slabu je se djica cidja •i gy jdice lo du'u binxo lo jibni be lo mensi gi'e lacpu fi lo skaci gi'e tai gasnu lo nu my jimpe lo du'u my zifre lo nu klama fi'o kansa lo jgita lo nenri be lo gy kumfa •i ki'u bo no da kakne lo nu cnemu my lo zgike kei tai lo se djica be gy •i gy djica lo nu no roi curmi lo nu my cliva lo gy kumfa kei ze'a do'a nai lo nu gy jmive •i da'i lo to'e melbi tarmi be gy cu pa re'u pilno xamgu •i gy djica lo nu zvati ca pa da lo ro vorme be lo gy kumfa gi'e renro gy lo gunta be gy •i ku'i da'i .ei lo mensi cu stali gy ge nai bai ku gi fi'o djica my •i .ei my lamji be gy zutse lo sofa gi'e gasnu lo nu salpo fa lo kerlo fa'a gy

•i gy djica lo nu gasnu lo nu my djuno lo du'u ge gy pu jdari platu lo nu benji my lo zgike ckule gi gy ca lo pu zi xriso jbena detri to la'a lo xriso jbena detri cu xa'o purci toi va'o lo nu da'i lo betri na pu kruca lo gy se litru cu da'i cusku fi ro da se cau lo nu se raktu lo te spuda •i da'i lo mensi ba lo nu tirna la'e di'u cu spoja lo cinmo se klaku •i da'i la .gregor. cu lafti gy fa'a lo janco be my gi'e cinba my lo cnebo noi co'a lo nu my se jibri lo zarci cu lunbe se cau lo dasri ja jadni

ni'o lu doi io nanmu po'u la .samsas. li'u cu krixsa se cusku lo midju nanmu lo patfu •i my jarco se pi'o lo degji se cau lo nu jmina lo valsi kei lo farna be la .gregor. noi masno litru •i lo jgita cu binxo lo smaji •i ca lo cfari lo midju vitke cu cisma fa'a lo ri pendo fau lo nu gasnu lo nu muvdu fa lo stedu •i ba bo ra catlu la .gregor. •i lo patfu cu jinvi lo du'u lo nu gasnu lo nu surla fa lo vitke cu sarcu zmadu lo nu to'e trina la .gregor. •i to'e ki'u nai bo ge vy na sai xanka gi la .gregor. cu simlu lo ka zmadu lo jgita lo ka zdile vy •i py sutra fa'a vy gi'e troci fau lo nu lo birka cu preja kei lo nu catke vy fa'a lo vy kumfa gi'e ca bo rivbi se pi'o lo py xadni lo nu vy kakne lo nu viska la .gregor. •i je'u vy binxo lo milxe fengu be ga lo se tarti be lo patfu gi lo nu co'a sanji lo nu vy se cau lo nu djuno cu pu xabju lo lamji be lo tai me la .gregor. •i vy minde cpedu lo ve ciksi lo patfu gi'e lafti lo birka gi'e na'e surla lacpu lo vy flira kerfa gi'e mutce masno klama fa'a lo tirxe lo vy kumfa •i ca bo lo mensi cu bancu lo nu cfipu poi my farlu ke'a ca lo nu tai sukxa sisti tu'a lo zgike •i my frati ba lo nu ze'i jgari lo jgita jo'u lo se jgita lo to'e tinsa xance gi'e ze'i catlu lo zgike papri tai lo nu

za'o kelci •i my punji lo tutci lo tuple be lo mamta noi za'o zutse lo stizu fau lo nu nandu vasxu gi'e vlile se desku lo fepri •i lo mensi cu bajra fa'a lo lamji kumfa noi lo vitke cu sutra zenba lo ka binxo lo jibni be ke'a ri'a lo nu na sisti fa lo patfu •i za'a bai lo certu xance be lo mensi lo ckana gacri jo'u lo kicne cu vofli fa'a lo galto gi'e se ganzu •i my pu lo nu lo nanmu cu to'e cliva lo kumfa cu mo'u ganzu lo ckana gi'e na'e se zgana klama lo bartu •i lo patfu cu simlu lo ka tai se jitro lo ka xarnu kei ja'e lo nu to'e morji lo nu sinma poi je'u py dejni ke'a lo vitke •i py catke po'o gi'e catke co'u lo nu ca'u lo vorme be lo kumfa lo midju nanmu cu lindi tikpa lo loldi gi'e ta'i dicra lo patfu •i lu ca'e mi gasnu lo nu do djuno sei lo midju nanmu cu cusku be fau lo nu lafti lo xance gi'e catlu sisku lo mamta jo'u lo mensi se'u lo du'u mi mu'i lo rigni tcini poi vanbi lo vi zdani jo'u lo vi lanzu sei ca ku lo midju nanmu fo lo loldi cu jdice sputu se'u cu nau sa'e cliva lo kumfa •i .ai li'a mi pleji no da do tu'a lo djedi poi mi pu xabju ti •i si'a nai mi ba pensi lo du'u xu kau mi na flalu cpedu fi do fe da noi frili se jicmu li'u •i lo midju nanmu cu co'u cusku gi'e catlu lo crane tai lo nu denpa da •i je'u lo re pendu cu zi jmina lo di'e valsi •i lu mi ji'a nau cliva lo kumfa li'u •i ba la'e di'u lo midju nanmu cu jgari lo vorme batke gi'e darxi gasnu lo nu ganlo fa lo vorme

ni'o lo patfu cu desku klama gi'e pencu lo vacri lo xance fa'a lo stizu gi'e sevzi curmi lo nu farlu ri •i py simlu lo ka binxo lo bredi be lo tcaci nu ze'i vanci sipna •i ku'i lo nu condi salpo fa lo steduo noi ke'a

dandu tai lo nu no da sarji ke'a cu jarco lo nu py na sai sipna •i la .gregor. cu vreta fau lo nu ro roi smaji kei lo se zvati poi lo vitke pu facti gy ke'a •i ge lo nu gy badri lo nu fliba lo se platu gi ji'a ju'o cu'i lo nu gy ruble ri'a lo nu xagji poi gy lifri ke'a cu fanta lo nu gy muvdu •i gy ji'u terpa lo nu ba zi farlu gy fa lo jursa carvi •i je gy denpa •i gy na se spaji lo ji'a sai sance be lo jgita noi ke'a pa'o lo desku degji be lo mamta cu farlu fi lo tuple be ri gi'e cupra lo cladu savru

ni'o lu doi dirba rirni sei lo mensi fau lo nu darxi lo jubme tai lo nu cfari sinxa cu cusku •i ti na ka'e ranji tai ti •i ju'o cu'i do na sanji •i mi ku'i ja'a sanji •i mi na djica ca'u lo vu danlu lo nu bacru lo cmene be lo bruna be mi •i ja'o mi cusku di'e po'o •i .e'i mi'o troci lo nu vimcu tu mi'o •i mi'o pu zunkte ro remna cumki lo nu kurji tu gi'e to'e fapru tu •i pe'i no da kakne lo nu sfasa cusku fi mi'o li'u •i lu do pa roi je pa ki'o roi drani li'u cu se cusku lo patfu fa'a lo nenri be ri •i lo mamta noi za'o claxu lo banzu vacri cu co'a to'e cladu kafke fa'a lo xance poi crane lo moklu ku'o fau lo nu fenki frumu se pi'o lo kanla •i lo mensi cu bajra fa'a lo mamta gi'e sarji lo mabru •i lo patfu cu simlu lo ka jinru lo nu pensi •i py ri'a lo valsip pe lo mensi cu sanli zutse •i py kelci lo mapku noi jbini lo palta noi ke'a co'a lo sanmi pe lo vitke cu za'o cpana lo jubme •i py ru'i nai catlu la .gregor. noi ca'o smaji

ni'o lu .e'i mi'o troci lo nu vimcu tu mi'o li'u cu se cusku lo mensi lo po'o patfu •i lo mamta ri'a lo nu kafke cu tirna no da •i lu ba'a tu ba catra lo re do •i da va'o lo nu tai nandu gunka tai lo nu mi'o gunka cu

na kakne lo nu ji'a renvi bu'u lo zdani lo cimni se dunku .i mi ji'a na kakne lo nu za'o renvi li'u .i my co'a tai vlile klaku ja'e lo nu lo se klaku cu farlu lo flira be lo mamta .i lo mensi cu zmiku pilno lo xance lo nu gau sudga

ni'o lu doi verba sei lo patfu cu kecti je jimpe cusku .i mi'o kakne lo nu zunkte ma li'u

ni'o ku'i lo mensi cu crepu lo janco tai lo sinxa be lo jenca poi ke'a ca lo nu my klaku cu jitro my fi'o dukti lo nu pu darsi .i lu va'o lo nu da'i tu jimpe li'u cu se cusku lo patfu se pi'o lo xadba preti tonga .i lo mensi fau lo nu klaku cu vlile gasnu lo nu muvdu fa lo xance fi'o se sinxa lo nu na kakne lo nu pensi ji'a sai la'e di'u .i lu va'o lo nu da'i tu jimpe li'u cu za'u re'u se cusku lo patfu .i py gasnu lo nu ganlo fa lo kanla kei gi'e gasnu lo nu me py ji'a moi fa lo me lo mensi moi nu birti lo du'u la'e di'u na cumki .i lu va'o la'e di'u cu da'i cumki fa lo nu snada lo nu tugni tu .i ku'i y li'u

ni'o lu .e'i tu cliva sei lo mensi cu krixu cusku .i la'e di'u po'o cumki doi patfu .i .ei do cliva po'o lo si'o tu me la .gregor. .i lo nu ze'u krici la'e di'u cu jetnu betri mi'o .i ku'i ta'i ma cumki fa lo nu tu me la .gregor. .i tu va'o lo nu da'i me la .gregor. cu da'i pu zu jimpe lo du'u na cumki fa lo nu kansa fa lo prenu lo tai danlu lo nu jmive .i da'i tu cliva fi'o djica tu .i mi xa'o na se bruna gi'e ku'i kakne lo nu di'a jmive kei gi'e ralte lo virnu se morji .i ku'i lo vi mabla danlu cu jersi mi'o gi'e to'e trina lo vitke gi'e li'a djica lo nu tu binxo loponse be

pi ro lo zdani gi'e curmi lo nu mi'o pagre lo nictu bu'u lo klaji •i ju'i patfu sei my sukxa krixa •i ii tu za'u re'u co'a co'e li'u •i lo mensi fau lo nu xalni poi mulno na'e se jimpe la .gregor. cu cliva lo ji'a sai mamta gi'e sevzi renro to'o lo stizu tai lo nu rigni mleca fa lo nu cirko lo mamta kei lo nu stali lo jibni be la .gregor. •i lo mensi cu sutra klama lo trixe be lo patfu noi se fanza lo se tarti be gy gi'e binxo lo sanli gi'e lafti lo birka te zu'e lo nu bandu lo mensi

ni'o ku'i la .gregor. cu na sai platu lo nu gasnu lo nu da terpa •i steci go'i tu'a lo mensi •i gy co'a carna po'o te zu'e lo nu xruti lo kumfa •i la'e di'u cu jundi trina ki'u lo nu gy se ja'e lo gy bilma tcini cu nitcu fi lo nu tai nandu carna kei fe lo nu pilno lo stedu noi gy so'i roi lafti ke'a gi'e darxi lo loldi ke'a •i gy sisti gi'e catlu lo sruri •i lo gy vrude se platu cu simlu lo ka se jimpe •i lo nu terpa cu pu ze'i zasni •i ro da nau badri je smaji catlu •i lo mamta cu vreta lo stizu fau lo nu lo tuple cu preja gi'e tagji simxu •i lo kanla cu na'e ru'e ganlo ri'a lo nu traji lo ka tatpi •i lo patfu jo'u lo mensi cu lamji simxu zutse •i lo mensi cu ba'o punji lo birka lo sruri be lo cnebo be lo patfu •i lu ju'o cu'i mi nau kakne lo nu carna li'u cu se pensi la .gregor. noi za'u re'u co'a zukte •i gy na kakne lo nu rivbi lo nu tatpi cmoni ri'a lo nu nandu troci •i gy bilga lo nu so'o roi surla

ni'o zu'u nai no da troci lo nu gy sutra •i curmi lo nu gy zukte lo se djica •i gy ca lo nu mo'u carna cu zi co'a xruti klama fo lo sirji •i gy manci lo barda te sepli be gy bei lo kumfa gi'e na jimpe lo du'u ta'i ma

kau fau lo nu tai ruble cu pu zi litru lo mintu dargu se cau lo nu sanji
•i gy stodi jundi lo nu sutra litru •i gy ja'a ru'e sanji lo nu no valsı .e
no se bacru be lo lanzu cu fanza gy

ni'o gy ca lo nu xa'o zvati lo vorme cu gasnu lo nu carna fa lo stedu
•i na'e mulno go'i ki'u lo nu gy ganse lo nu lo cnebo cu tinsa binxo •i
ku'i gy ja'a viska lo nu no da za'o cenba •i lo po'o mensi cu pu binxo
lo sanli •i lo ro moi nu gy catlu cu satre lo mamta noi uo condi sipna

ni'o ba lo nu gy klama lo nenri be lo kumfa cu zi binxo fa lo vorme
lo ganlo se pi'o lo ckiku •i lo sukxa savru poi se cupra ti'a la .gregor.
cu tai se terpa gy ja'e lo nu lo cmalu tuple be gy cu se polje •i me lo
mensi fa lo pu tai sutra •i my pu stali lo ka sanli tu kei gi'e denpa gi'e
sutra plipe lo crane •i la .gregor. na tirna ji'a sai lo nu my klama •i my
krixa zo uo fa'a lo rirni ca lo nu pilno lo ckiku

ni'o lu nau mo li'u cu preti fi la .gregor. gy fau lo nu catlu lo sruri
va'o lo manku •i gy zi facki lo du'u gy xa'o na kakne lo nu muvdu •i
gy na se cizra •i simlu lo ka na'e rarna kei fa lo nu gy co'u lo cabna cu
ja'a ze'a kakne lo nu muvdu se pi'o lo cmalu tuple •i ji'a gy lifri lo
milxe pluka •i je'u gy cortu pi ro lo xadni •i ku'i lo nu cortu cu simlu
lo ka zenba je zenba lo ka ruble kei gi'e mulno canci ca lo fanmo •i gy
xa'o ja'a ru'e ganse lo trixe ke fusra plise jo'u lo sruri ve xrani vu'o noi
se gacri lo xutla pulce •i gy prami je cinmo pensi lo lanzu be gy •i lo
gy se jinvi poi du'u .ei gy canci cu zmadu ji'a sai lo me lo mensi moi lo
ka jdice jdari •i gy stali lo tcini poi nu panpi je cando pensi ku'o co'u

lo nu lo junla pe lo galtu dinju cu sance jarco li ci pe lo cerni murse •i
gy za'o jmive ca lo nu co'a donri ti'a lo canko blaci •i ba bo fi'o na djica
gy ge lo stedu cu farlu lo loldi gi lo nazbi kevna cu te jetce lo ro moi
ke vasxu se cmoni

ni'o ca lo clira cerni lo sidju ninmu cu to'e cliva to sy ny ri'a lo nu
tsali je sutra kei to'e ri'a nai lo nu so'i roi te cpedu lo nu rivbi cu tai
darxi lo vorme ja'e lo nu co'a lo nu sy ny to'e cliva cu na'e cumki bu'u
pi ro lo zdani fa lo nu da sipna toi gi'e sanji ca lo cfari no na'e fadni ca
lo tcaci je tordu nu vitke la .gregor. •i sy ny jinvi lo du'u gy tai cando
vreta te zu'e lo nu tcica fi lo nu gy cinmo cortu •i sy ny jinvi lo du'u gy
mulno jimpe ro da •i sy ny cu ca'o snuti jgari lo clani burcu lo xance
gi'e troci lo nu pilno ra lo nu satre la .gregor. to'o lo vorme •i sy ny cu
snada no da ta'i la'e di'u gi'e binxo lo fengu gi'e milxe tunta la .gregor.
•i sy ny ca lo nu ba'o gasnu se cau lo nu gy fapro kei lo nu gy movdu
cu jundi gy •i sy ny ca lo nu sanji lo jetnu tcini cu gasnu lo nu mutce
kalri fa lo kanla kei gi'e siclu fa'a lo sevzi nenri gi'e ku'i na ze'u stali •i
sy ny gasnu lo nu mulno kalri fa lo vorme be lo kumfa kei gi'e cladu
voksa krixu fa'a lo manku lu ju'i do'u tu spofu •i vu mulno spofu li'u

ni'o lo speni simxu po'u la .samsas. cu binxo lo zutse be lo ckana
gi'e nitcu lo nu bancu lo jenca poi se rinka lo sidju ninmu kei pu lo nu
co'a jimpe lo notci be fi sy ny •i ba bo lo nanmu fa'u lo ninmu vu'o
po'u la .samsas. cu sutra cliva lo ckana lo vo'a mlana •i lo nanmu po'u
la .samsas. cu punji lo ckana gacri lo janco •i lo ninmu po'u la .samsas.

cu dasni lo sipna creka •i tai klama lo nenri be lo kumfa pe la .gregor.
•i ca bo binxo lo kalri fa lo ji'a vorme be lo ralju kumfa noi bu'u ke'a
cu sipna fa la .greten. co'a lo nu lo vitke cu to'e cliva •i ra mulno dasni
tai lo nu na pu sipna •i lo blabi flira be ra cu simlu lo ka jarco lo nu
jetnu fa la'e di'u •i lu xu morsi li'u cu se cusku lo ninmu po'u la
.samsas. •i ny lafti lo kanla fa'a lo sidju ninmu fau lo nu preti se flira
to'e ki'u nai lo nu ny mi'u kakne lo nu cipra lo jetnu •i ji'a sai ny kakne
lo nu sanji se cau lo nu cipra lo jetnu •i lu ia sai li'u se cusku lo sidju
ninmu noi te zu'e lo nu jarco cu catke lo morsi xadni be la .gregor. se
pi'o lo lumci burcu ve'a lo vajni fa'a lo mlana •i lo ninmu po'u la
.samsas. cu muvdu tai lo nu da'i djica lo nu dicra lo lumci burcu •i
ku'i na dicra •i lu uo sei lo nanmu po'u la .samsas. cu cusku •i mi'o
nau kakne lo nu ckire lo cevni li'u •i ny kruca sinxa zukte •i lo ci
ninmu cu jersi lo mupli •i la .greten. noi na co'u catlu lo morsi xadni
cu cusku lu ua tu cinla •i tu ze'u pu citka no da •i lo cidja cu na'e
cenba co'a lo nu dunda kei co'u lo nu lebna li'u •i je'u lo xadni be la
.gregor cu mulno plita je sudga •i la'e di'u cu nau se jundi ca lo nu ge
ra na se lafti lo cmalu tuple gi no drata cuntu cu trina lo nu catlu

ni'o lu doi .greten. ko klama lo mi'a kumfa li'u cu se cusku lo
ninmu po'u la .samsas. zi'e noi milxe badri cisma •i la .greten. cu jersi
lo rirni fa'a lo sipna kumfa se cau nai lo nu catlu lo morsi xadni •i lo
sidju ninmu cu gasnu lo nu ganlo fa lo vorme gi'e mulno kalri fa lo

canko •i lo milxe glare to'e ki'u nai lo nu clira cerni cu kansa lo lenku vacri lo nu mixre •i fanmo lo masti po'u li ci

ni'o lo ci vitke cu cliva lo ri kumfa gi'e manci catlu lo sruri fau lo nu sisku lo cerni sanmi •i da to'e morji vy •i lu lo cerni sanmi cu zvati ma li'u cu preti se cusku lo midju nanmu lo sidju ninmu se pi'o lo fengu voksa •i ku'i lo sidju ninmu cu punji lo degji lo moklu gi'e sutra je smaji jarco lo xance sinxa lo nanmu te zu'e lo nu ny klama lo kumfa pe la .gregor. •i ny klama gi'e stali lo ka sanli fau lo nu lo xance cu nenri lo daski be lo ny milxe xaksu kosta •i ny sruri lo morsi xadni bu'u lo mulno se gusni kumfa pe la .gregor.

ni'o lo vorme be lo sipna kumfa cu binxo lo kalri •i je lo nanmu po'u la .samsas. cu to'e canci fau lo nu dasni lo manfo taxfu •i lo speni cu jgari lo birka •i je lo tixnu cu jgari lo drata birka •i ro da milxe klaku •i la .greten. cu so'o roi punji lo flira lo birka be lo patfu •i lu ko zi cliva lo zdani be mi li'u cu se cusku lo nanmu po'u la .samsas. •i ny jarco lo farna be lo vorme se cau lo nu to'e jgari lo ninmu •i lu do djica lo nu cusku ma li'u cu xadba jenca se cusku lo midju nanmu noi milxe tcica cisma •i lo re drata cu ru'i mosra lo xance lo drata xance bu'u lo trixe be lo xadni tai lo nu kanpe lo banli nu damba poi ba te prali ra •i lu mi djica lo nu cusku lo se cusku be mi li'u cu spuda se cusku lo nanmu po'u la .samsas. fau lo nu kansa be lo ninmu be'o klama lo midju vitke •i ri ca lo cfari cu stali gi'e smaji gi'e catlu lo loldi tai lo nu ganzu da lo cnino bu'u lo stedu •i lu ja'o mi'a cliva li'u cu se cusku lo

midju vitke •i ri lafti lo kanla fa'a lo nanmu po'u la .samsas. tai lo nu suksa cumla gi'e cpedu ji'a sai lo nu ny curmi lo nu jdice la'e di'u •i lo nanmu po'u la .samsas. cu so'o roi zanru jarco po'o fau lo nu mutce kalri kanla •i ba bo lo midju vitke cu barda stapa klama lo rinsa kumfa •i lo re pendo cu ze'a pu tirna fau lo nu lo xance cu mulno cando •i ra nau plipe ti'a lo midju vitke tai lo nu terpa lo nu lo nanmu po'u la .samsas. ba purci ra lo ka klama lo nenri be lo rinsa kumfa kei gi'e fanta lo nu ra lamji lo gidva be ra •i bu'u lo rinsa kumfa lo ci mei cu lebna lo mapku lo te dandu gi'e to'e setca lo grana lo grana vasru gi'e smaji ke sinma salpo gi'e cliva lo zdani •i lo nanmu po'u la .samsas. fau lo nu na'e lacri noi claxu lo krino tai lo nu ba se jarco cu klama lo bartu fi'o se kansa lo re ninmu fe lo serti tsina gi'e se sarji lo serti garna gi'e viska lo nu lo ci mei cu masno je ku'i stodi klama lo cnita fo lo clani serti •i lo nanmu bu'u ro loldi cu canci lo trixe be lo kruvi gi'e ba zi za'u re'u to'e canci •i ra ca lo nu zenba lo ka cnita cu jdika lo ka cinri lo lanzu •i lo nanmu po'u la .samsas. jo'u lo re ninmu ca lo nu lo rectu vecnu noi lo se bevri cu cpana lo stedu be ke'a cu binxo lo crane lamji be lo ci nanmu gi'e ba bo kruca ri gi'e za'o klama lo gapru cu cliva lo serti tsina gi'e xruti lo zdani tai lo nu binxo lo na se raktu

ni'o lo lanzu cu jdice lo du'u pilno lo donri lo nu surla gi'e pluka litru •i ra ge po'o nai pu jerna lo nu denpa fo lo nu gunka gi ji'a sai traji lo ka nitcu •i ja'e bo ra zutse re'o lo jubme gi'e ciska lo krinu notci

•i lo nanmu po'u la .samsas. cu te notci fo lo ri ralju •i lo ninmu po'u la .samsas. cu go'i fo lo nanmu poi ke'a dunda lo se gunka ra •i la .greten. cu go'i fo lo ponse be lo zarci •i ca lo nu ciska kei lo sidju ninmu cu klama lo nenri te zu'e lo nu cusku lo se du'u sy ny cliva ki'u lo nu mo'u gunka lo me lo cerni moi •i lo ci ciska cu sinxa zanru po'o ca lo cfari se cau lo nu catlu lo gapru •i ra ca lo nu lo sidju ninmu na jarco lo nu cliva cu catlu lo gapru fau lo nu fengu •i lu ma fasnu li'u cu preti se cusku lo nanmu po'u la .samsas. •i lo sidju ninmu cu ca'o stali lo ka sanli lo lamji be lo vorme •i za'a sy ny djica lo nu gasnu lo nu djuno fa lo lanzu fi lo banli se snada •i ku'i da'i sy ny ba zunkte la'e di'u va'o lo po'o nu sy ny ve preti lo mulno tcila •i lo cmalu ke strutione pimlu poi na'e ru'e sirji cpana lo sy ny mapku zi'e noi co'a lo nu sy ny co'a selfu cu fanza lo nanmu po'u la .samsas. cu milxe slilu fa'a ro da •i lu do io djica ma li'u cu preti se cusku lo ninmu po'u la .samsas. noi traji lo ka sinma lo sidju ninmu kei lo ro ci da •i lu .u'a sei lo sidju ninmu noi lo nu clite cisma cu fanta lo nu za'o tavla cu cusku •i do na nitcu lo nu se raktu lo nu ta'i ma kau vimcu lo dacti pe lo lamji •i ro da ba'o se cikre li'u •i lo ninmu po'u la .samsas. ge'u jo'u la .greten. cu za'u re'u salpo fa'a lo xatra tai lo nu djica lo nu di'a ciska •i lo nanmu po'u la .samsas. zi'e noi sanji lo nu lo sidju ninmu cu djica lo nu co'a skicu lo ro tcila cu jdice fanta fau lo nu lo xance cu preja •i lo nu sy ny na kakne lo nu gasnu lo nu djuno cu rinka lo nu sy ny morji lo nu sy ny mutce sutra nitcu •i sy ny cinmo cortu krixu lu co'o

ro do li'u gi'e fengu carna gi'e cliva lo zdani fau lo nu jursa darxi
gasnu lo nu mulno fa lo vorme

ni'o lu .ai ca lo zi nicate tu co'u se jibri li'u cu se cusku lo nanmu
po'u la .samsas. •i ku'i ny se spuda ge nai lo speni gi nai lo tixnu ki'u
lo nu lo sidju ninmu cu simlu lo ka dicra lo nu panpi poi pu zi se
cpacu •i lo re ninmu cu binxo lo sanli gi'e klama lo canko gi'e stali ri
fau lo nu simxu lo ka jgari lo birka •i lo nanmu po'u la .samsas. cu
zutse carna fa'a lo re ninmu gi'e ze'i smaji zgana ri gi'e ba bo jundi
cpedu cusku lu .e'e ko ti klama •i ko to'e morji lo purci gi'e xendo mi
li'u •i lo ninmu cu zi tinbe gi'e bajra fa'a lo nanmu po'u la .samsas. gi'e
satre gi'e sutra lo nu mo'u ciska lo xatra

ni'o ba la'e di'u lo ci mei cu kansa simxu cliva lo zdani tai lo nu
ze'a lo masti be li so'i cu na zukte •i ra klama lo nurma no'u lo bartu
be lo tcadu fu lo trene •i lo se trene poi ra po'o zutse ne'i ke'a cu
mulno se gusni fi lo glare solri •i ra kufra zvati lo stizu gi'e casnu lo
ka'e se kanpe pe lo balvi •i ra jdice lo du'u lo cuntu ca lo nu jibni lanli
cu na sai xlali •i lo ci jibri noi je'u ra na pu simxu lo ka te preti ke'a cu
mutce xamgu gi'e zabna nupre •i ku'i li'a ju'o lo tcini cu ba zi zenba lo
ka xamgu kei lo barda ca lo nu ra cenba lo ka se zdani •i ra djica lo nu
muvdu lo cmalu je to'e kargu zmadu zdani poi ku'i zmadu fi lo ka
xamgu stuzi zi'e poi ra'u zmadu fi lo ka mapti kei fe lo cabna noi pu
se cuxna la .gregor. •i lo nanmu jo'u lo ninmu vu'o po'u la .samsas. ca
lo nu tai tavla cu na'e ru'e cabna simxu pensi ca lo nu viska lo tixnu

noi gleki zenba kei lo du'u ri ca lo ro moi temci to'e ri'a nai lo nabmi
poi rinka lo nu lo flira cu binxo lo blabi cu ba'o binxo lo vifne je melbi
ke citno ninmu •i lo rirni cu ca'o smaji zenba gi'e je'a ru'e sanji jimpe
simxu ta'i lo nu catlu •i ra pensi lo nu co'a temci drani lo ka sisku lo
xamgu speni •i ra te sinxa lo cnino se senva jo'u lo xamgu te zunkte lo
du'u lo tixnu ca lo fanmo be lo nu litru cu pa moi lo binxo be lo sanli
gi'e gasnu lo nu preja fa lo citno xadni

fa'o

